



積書巖宋詩刪第七卷目錄

七言古詩一

徐鉉 一首

寇準 一首

張詠 一首

楊億 一首

錢易 一首

韓琦 二首

文彥博 一首

蘇舜欽 六首

梅堯臣 十二首


歐陽修 二十四首

范純仁 一首

趙抃 一首

司馬光 二首

韓維 二首



積書巖宋詩刪卷七

錫山顧貞觀梁汾選

武陵胡獻徵存人閱

七言古詩一

徐鉉

題白鷺洲江鷗送陳君

白鷺洲邊江路斜輕鷗接翼滿平沙吾徒來送遠
行客停舟爲爾長歎息酒旗漁艇兩無猜月影蘆
花鎮相得離筵一曲怨復清滿座銷魂鳥不驚人

生不及水禽樂安用虛名上麟閣同心攜手今如此
金鼎丹砂何寂寞天涯後會渺難期從此又應
添白鬢願君不忘分飛處長保翩翩潔白姿

寇準

江南春

波渺渺柳依依孤村芳草遠斜日杏花飛江南春
盡離腸斷蘋滿汀洲人未歸

張詠

與進士宋嚴話別

人之相知須知心心通道合情轉深凌山跨陸不
道遠躡屩佩劍來相尋感君見我開口笑把臂要
我談王道幾度微言似愜心投盃著地推案叫此
事置之無復言且須舉樂催金船人生通塞未可
保莫使閒事相縈牽興盡忽告去挑燈夜如何彈
琴起雙舞拍手聊長歌我輩本無流俗態不教離
恨上眉多

楊億

禁直

鳳樓鴛瓦蟾波濕衆籟聲沈百蟲蟄仙盤雲表露
成霜何人夜半牛衣泣芝泥香熟封詔書河漢西
傾移斗車陰風撼撼起庭樹寒澌戛戛鳴宮渠千
廬迭唱傳宵警海山鼇背蓬壺頂金釭珠網結綺
錢玉井銀牀垂素綆前席受釐詢碩生觀書百行
須中程投籤乍應嚴鼓節求衣誤聽蒼蠅聲渴烏
漏盡繁星曙魚鑰建章開萬戶初日曛曩豔屋梁
鳴鞭一聲天下路

錢易

西遊曲

花梢秋老白日短敗紅荒綠迷空館擬將清血灑
昭陵幽谷蛇啼半山晚十年辭家勤獻書王孫不
許延公車江頭祖廟祭無日重門生草寒離離我
有黃金三尺劍姦骨餘痕古波濫佩入函關無故
人玉握凋零七星暗

韓琦

答章望之祕校惠詩求古瓦硯

魏宮之廢知幾春其間萬事成埃塵惟有昭陽殿

瓦不可壞埋沒曠野迷荒榛陶甄何法世莫得但
貴美璞踰方珉數百年來取爲硯墨光爛發波成
輪求之日盛得日少片材無異圭璧珍巧工近歲
知衆寶雜以假僞窺錢緡頭方面凸槩難別千百
未有三二真我來本邦責鄴令朝搜暮索勞精神
遺基壞地徧剝窟始獲一瓦全元淳蘚斑著骨尚
乾翠夜雨點漬痕如新當時此復近簷溜印以篆
字花其脣磨礱累日喜成就要完舊質知無倫吾
才寡陋不足稱思與好古能文人好古能文今者

誰武寧祕書章表民無詩尙欲拊兩手何況大雅
之奏聞鏗純

答陳舜俞推官惠詩求全瓦古硯

鄴宮廢瓦埋荒草取之爲硯誠堅好求者如麻幾
百年宜乎今日難搜討吾邦巧匠世其業能辨瓌
奇幼而老隨材就器固不遺大則梁棟細芴椽必
須完者始稱珍何殊巨海尋三島荆人之璧尙有
瑕夏后之璜豈無考况乎是物出坏陶千耕萬斲
常翻攪吾今所得不專全祕若英瑤藉文纁君詩

苦擇未如意持贈只虞供絕倒君不見鎮圭尺二
瑁四寸大小雖異皆君寶

文彥博

過燕川渡

燕川東北孔山西借車直渡馬頭溪農樵引路津
不迷行行引上青雲梯回頭下視林木低谷風冷
泠山鳥啼巖隈泉甘土仍肥昔人於斯卜幽棲春
深芝朮生新蕘采芝茹朮希夷齊諸公共遊不知
疲長吟吐氣如虹蜺水濱石上寫此詩手拭蒼蘚

脚踏泥冒寒履險不憚辭勉欲繼踵前賢題

蘇舜欽

田家詞

南風霏霏麥花落豆田漠漠初垂角山邊夜半一
犁雨田父高歌待收穫雨多蕭蕭蠶簇寒蠶婦低
眉憂繭單人生多求復多怨天公供爾良獨難

寄王幾道同年

新安道中物色佳山昏雲淡晚雨斜眼看好景懶
下馬心隨流水先還家步頭浴鳧暖出沒石側老

松寒交加懷君覽古意萬狀獨轉澗口吟幽花

送李冀州詩

寇蓋傾城車馬稠都門曉送李冀州冀州綠髮三
十一趨趨千騎居上頭眼如堅冰面珂月氣勁健
鶻橫清秋不爲膏梁所汨沒直與忠義相沉浮干
戈未定民力屈此行正分天子憂男兒勝衣志四
海實恥坐得萬戶侯旆旌明滅薊野濶笳鼓淒斷
邊風愁孤雲南飛莫回首下有慈親雙淚眸自古
忠孝不兩立功名及時乃可收衆人刮目看能事

著鞭無爲儒生羞

和永叔琅邪山庶子泉陽冰石篆詩

一氣破散萬事起獨有篆籀含其真周鼓秦碑壞
已久下至唐室始有人宗臣轉注得天法質雖渾
厚氣乃振人間所存十數處豐疎異體世共珍其
中琅邪石泉記比之他法殊不倫鐵鎖關連玉鈎
壯曲處力可挂萬鈞復疑蛟虬植爪角隱入翠壁
蟠未伸近來俗眼苦不賞惟有風月時相親紫微
仙人謫此守此地勝絕舊喜聞公餘往觀領賓從

獵獵画隼搖青春遠休車騎步泉側酌泉愛篆移
朝昏揮弄潺湲玩點畫情通恍忽疑前身作詩緘
本遠相寄邀我共賦意甚勤昨承見教久閣筆壓
以大句尤難文高風勝事日傾倒安得身寄西飛
雲

哭曼卿

去年春風開百花與君相會歡無涯高歌長吟插
花飲醉倒不去眠君家今年慟哭來致奠忍欲出
送攀魂車春輝照眼一如昨花已破額蘭生芽惟

君顏色不復見精魄飄忽隨朝霞歸來悲痛不能
食壁上遺墨如棲鴉嗚呼死生遂相隔使我雙淚
風中斜

演化琴德素高昔嘗供奉先帝聞予所藏
寶琴求而揮弄不忍去因爲作歌以寫
其意云

雙螯老師古突兀索我瑤琴一揮拂風吹仙籟下
虛空滿坐沉沉竦毛骨按抑不知聲在指指自不
知心所起節奏可盡韻可收時於疎澹之中寄深

意意深味薄我獨知陶然直到羲皇世曲終瞑目
師不言忽言昔常奉至尊祥符天子政多暇詔求
絕藝傳中闈紫宸仗退霜日紅隨鞭入對蓬萊宮
平戎一弄沃舜聰貂璫壁立亦動容紫蘭之袍出
禁府聲華一日千門通今來老病臥澤國賞音不
遇前事空一雙玉鶴天上飛人間但見枯死桐幸
逢寶器愜心手因聲感舊涕灑曾顧我踟躕不忍
去將行更欲留悲風

梅堯臣

竹雞

泥滑滑苦竹岡雨蕭蕭馬上郎馬蹄凌兢雨又急
此鳥爲君應斷腸

挾彈篇

長安細侯年尙少獨出春郊不須曉手持柘彈霸
陵邊豈惜金丸射飛鳥金丸射盡飛鳥空解衣市
酒向新豐醉倒銀餅方肯去去臥紅樓歌吹中不
管花開與花老明朝還去杜城東

和永叔柘枝歌

漁陽三疊音隆隆紅蕖亂坼當秋風披香擁霧出
妖嫋嫋眉壯髮翩驚鴻鏘鏘雜珮離芳渚珠帽紅
鞞振金縷相迎垂手勢如傾障袂倚詞欲吐最
憐應節乍低昂便轉疾徐皆可觀飄揚初認雪迴
風躑躅還看鬘縈緒小小寧聞怨曲長盈盈自解
依儔侶藝奇體妙按者誰金貂大尹宴清池綺茵
繡幄粲輝映玳簪珠履何委蛇是時郊原新退暑
天清氣爽過林墅淮王載酒昔嘗聞謝公攜妓那
能數始知事簡樂民和不厭來觀柘枝舞

路中月夕登霽景臺與唐英語別

風枝不動月光午况是高臺過新雨吳客方思千
里歸不耐洛陽塵與土到時水落鱖鱸肥香稻初
炊鱸紅縷休言羊酪敵蓴羹我亦長吟念東楚平
明馬嘶誰可留去去相望富春渚

棟花

紫絲暈粉綴蘼花綠羅布葉攢飛霞鶯舌未調香
萼醉柔風細吹銅梗斜金鞍結束果下馬低枝不
礙無闌遮長陵小市見阿姊濃熏馥郁升鈿車莫

輕貧賤出閭巷迎入漢宮人自誇

途次寄羅道濟

去年五月君到官紅蕖正開湖水寬共酌汀洲不知暮扣舷月露霑衣寒今年我罷欲歸去朋酒久來無此歡移舟不忍便爲別競挈盃肴情未闌城闌欲閉各分散溪雲暗澹生悲端明日抱醒風雨急野蓮空看寄君難

送僉判張祕丞赴秀州

江燕歸時君亦歸燕巢未暖君還去去去溪邊楊

柳多正值清明欲飛絮競折贈行何所益時當長養傷嘉樹不如舉酒對青山酒罷移舟須薄暮嘉禾主人余久知疎冗不擬強攀附倘或無忘問姓名爲言懶拙皆如故

送石昌言舍人使匈奴

燕然山北大單于漢家皇帝與璽書持書大夫腰金魚飛龍借馬出國都胡沙九月草已枯草上霜花如五銖白裘貂帽著不暖莽莽黃塵車欵欵野廬邊月出隴來風靜天遙雁聲短聞到蜀庭尤苦

寒譚言揉耳不譏彈公於是時已觀禮踏雪再拜
辭可汗

送葛都官南歸

不羨新爲赤縣尹惟羨暫向江南歸江南羃羃梅
雨時風帆差差並鳥飛習竿夾岸長若梳水籠畜
魚鮮且肥家在千山古溪上先應喜鵲噪門扉

龍女祠祈順風

龍女祠相依風雲隨所變舟人請予往出廟旗脚
轉旗指西南歸飛帆疾流電長蘆江口發平明白

鷺洲前已朝膳竹根盃玦不欺人世間然諾空當
面

送韓玉汝太傅知洋州

春風東來幾萬里相送入關如有情灞陵原邊柳
條暗咸陽橋畔桃花明自古恨別此兩處十千美
酒瑠璃傾日落未落車馬動子規滴血壯士驚行
哉使君負膽氣蜀道雖險心常輕是時門前大桐
樹爛漫紫萼啼流鶯弟兄同懷不可見應亦夢覺
嗟遠程太白山前一尺雨桑下問蠶田問耕郡城

夜開百姓喜喜從迢遞壺漿迎

會勝院沃洲亭

前溪夾洲後溪濶風吹細浪龍鱗活孤亭一入野
氣深松上藤蘿籬上葛葛花葛蔓無斷時女蘿莫
翦連古枝當年吾叔讀書處夜夜濕螢來復去

歐陽修

黃牛峽祠

大川雖有神淫祀亦其俗石馬繫祠門山鷄噪叢
木潭潭村鼓隔溪聞楚巫歌舞送迎神畫船百丈

山前路上灘下峽長來去江水東流不暫停黃牛
千古長如故峽山侵天起青嶂崖崩路絕無由上
黃牛不下江頭飲行人惟向舟中望朝朝暮暮見
黃牛徒使行人過此愁山高更遠望猶見不是黃
牛滯客舟

千葉紅梨花

峽州署中舊有此花

紅梨千葉愛者誰白髮郎官心好奇徘徊繞樹不
忍折一日千市看無時夷陵寂寞千山裏地遠氣
偏時節異愁烟苦霧少芳菲野卉蠻花鬪紅紫可

憐此樹生此處高枝絕豔無人顧春風吹落復吹
開山鳥飛來自飛去根盤樹老幾經春真賞今纔
遇使君風輕絳雪樽前舞日暖繁香露下聞從來
奇物產天涯安得移根植帝家猶勝張騫爲漢使
辛勤西域徙榴花

和丁寶臣遊甘泉寺

江上孤峯蔽綠蘿縣樓終日對嵯峨叢林已廢姜
祠在事迹難尋楚語譌空餘一派寒巖側澄碧泓
亭涵玉色野僧豈解惜清泉蠻俗那知爲勝迹西

陵老令好尋幽時共登臨向此遊欹危一逕穿林
樾盤石蒼苔留客歇山深雲日變陰晴澗栢巖松
度歲青谷裏花開知地暖林間鳥語作春聲依依
渡口夕陽時却望層巒在翠微城頭暮鼓休催客
更待橫江弄月歸

晉祠

古城南出十里間鳴渠夾路何潺潺行人望祠下
馬謁退卽祠下窺水源地靈草木得餘潤鬱鬱古
栢含蒼烟并兒自古事豪俠戰爭五代幾百年天

開地闢真主出猶須再駕方凱旋頑民盡遷高壘
削秋草自綠埋空垣并人昔遊晉水上清鏡照耀
涵朱顏晉水今入并州裏稻花漠漠澆平田廢典
髣髴無舊老氣象寂寞餘山川惟存祖宗聖功業
干戈象舞被管絃我來覽登爲歎息暫照白髮臨
清泉鳥啼人去廟門闔還有山月來娟娟

風吹沙

北風吹沙千里黃馬行确犖悲摧藏當冬萬物慘
顏色冰雪射日生光茫一年百日風塵道安得朱

顏長美好攬鞍鞭馬行勿遲酒熟花開二月時

再和明妃曲

漢宮有佳人天子初未識一朝隨漢使遠嫁單于
國絕色天下無一失難再得雖能殺畫工於事竟
何益耳目所及尙如此萬里安能制夷狄漢計誠
已拙女色難自誇明妃去時淚灑向枝上花狂風
日暮起飄泊落誰家紅顏勝人多薄命莫怨春風
當自嗟

惠泉亭

翠壁刻孱顏烟霞跬步間使君能愛客朝夕弄山
泉春巖雨過春流長置酒來聽山溜響鑑中樓閣
俯清池雪裏峯巒開曉幌須知清興無時已酒美
賓嘉自相對席間誰伴謝公吟日暮多逢山簡醉
淹留桂樹幾經春野鳥巖花識使君使君今是罇
前客誰與山泉作主人

三遊洞

漾檝泝清川捨舟緣翠嶺探奇冒層嶮因以窮人
境弄舟終日愛雲山徒見青蒼杳靄間誰知一室

烟霞裏乳竇雲腴凝石髓蒼崖一徑橫查渡翠壁
千尋當戶起昔人心賞爲誰留人去山阿跡更幽
青蘿綠桂何岑寂山鳥嚶嚶不驚客松鳴澗底自
生風月出林間來照席仙境難尋復易迷山回路
轉幾人知惟應洞口春花落流出巖前百丈谿

戲贈

莫愁家住洛川傍十五纖腰聞四方堂上金罇邀
上客門前白馬繫垂楊春風滿城花滿樹落日花
光爭粉光城頭行人莫駐馬一曲能令君斷腸

奉使道中

爲客莫思家客行方遠道還家自有時空使朱顏
老禁城春色暖融怡花倚春風待客歸勸君還家
須飲酒記取思歸未得時

擬剝啄行寄趙少師

剝剝復啄啄柴門驚鳥雀故人千里駕信士百金
諾搢紳相趨動顏色閭巷歡呼共嗟愕顧我非惟
慰寂寥於時自可警偷薄事國十年憂患同酣歌
幾日暫相從酒醒初不戒徒馭歸思瞥起如飛鴻

車馬聞然人已去荷鋤却向野田中

於劉功曹家見楊直講女奴彈琵琶戲作

呈聖俞

大絃聲遲小絃促十歲嬌兒彈啄木啄木不啄新
生枝惟啄槎牙枯樹腹花繁蔽日鎖空園樹老參
天杳深谷不見啄木鳥但聞啄木聲春風和暖百
鳥語山路磽确行人行啄木飛從何處來花間葉
底時丁丁林空山靜啄愈響行人舉頭飛鳥驚嬌
兒身小指撥硬功曹廳冷絃索鳴繁聲急節傾四

坐爲爾飲盡黃金觥楊君好雅心不俗太學官卑
飯脫粟嬌兒兩幅青布裙三脚木牀坐調曲奇書
古畫不論價盛以錦囊裝玉軸披圖掩卷有時倦
臥聽琵琶仰看屋客來呼兒旋梳洗滿額花鈿貼
黃菊雖然可愛眉目秀無奈長饑頭頸縮宛陵詩
翁勿謂渠人生自足乃爲娛此兒此曲翁家無

述懷送張惣之

鬱鬱河隄綠樹平送君因得到東城落花已盡鶯
猶囀垂柳初長蟬欲鳴去年送客亦曾到正值楊

花亂芳草人心不復故時歡景物自隨新節好感
今懷昔復傷離一別相逢知幾時莫辭今日一罇
酒明日思君難重持東吳山水天下秀羨君輕舟
片帆逗江城月下夜聞歌淮浦山前朝放溜樂哉
此行時未晚萬壑千巖不知遠可憐病客厭京塵
寂寞淹留已再春扁舟待得東南下猶更河橋送
幾人

代贈田文初

感君一顧重千金贈君白璧爲妾心舟中繡被熏

香夜春雪江頭三尺深西陵長官頭已白憔悴窮
愁媿相識手持玉笋唱陽春江上梅花落如積津
亭送別君未悲夢闌酒解始相思須知巫峽聞猿
處不似荆江夜雪時

豐樂亭小飲

造化無情不擇物春光亦到深山中山桃溪杏少
意思自趁時節開春風看花遊女不知醜古妝野
態爭花紅人生行樂在勉強有酒莫負瑠璃鍾主
人勿笑花與女嗟爾自是花前翁

送張屯田歸洛歌

昔年洛浦見花落曾作悲歌歌落花愁來欲遣何
可奈時向金河尋杜家杜家花雖非絕品猶可開
顏爲之飲少年意氣易成懽醉不還家伴花寢一
來京國兩傷春憔悴窮愁九陌塵紅芳紫蒼處處
有騎馬欲尋無故人黃河三月入隋河河水多時
悵望多爲憐此水來何處中有伊流與洛波忽聞
君至自西京洗眼相看眼暫明心衰面老畏人問
驚我瘦骨清如冰端居移病新城下日不出門無

過者獨行時欲強高歌一曲未終雙涕灑可憐明
月與春風歲歲年年事不同暫別已嗟非舊態再
來應是作衰翁感時惜別情無已無詩送君空有
淚西歸必有問君人爲道別來今若此

日本刀歌

昆夸道遠不復通世傳切玉誰能窮寶刀近出日
本國越賈得之滄海東魚皮裝貼香木鞘黃白間
雜鍮與銅百金傳入好事手佩服可以穰妖凶傳
聞其國居大島土壤沃饒風俗好其先徐福詐秦民

採藥淹留卅童老百工五種與之居至今玩器皆
精巧前朝貢獻屢往來士人往往工詞藻徐福行
時書未焚逸書百篇今尙存令嚴不許傳中國舉
世無人識古文先王大典藏絕域滄波浩蕩無通
津令人感激坐流涕鏽澀短刀何足云

滄浪亭

子美寄我滄浪吟邀我共作滄浪篇滄浪有景不
可到使我東望心悠然荒灣野水氣象古高林翠
阜相回環新篁抽笋添夏影老楫亂發爭春妍水

禽閒暇自高格山鳥日夕相啾喧不知此地幾興
廢仰視喬木皆蒼烟堪嗟人迹到不遠雖有來路
曾無緣窮奇極怪誰似子搜索幽隱探神仙初尋
一逕入蒙密豁目異境無窮邊風高月白最宜夜
一片瑩淨鋪瓊田清光不辨水與月但見空碧涵
漪漣清風明月本無價可惜祇賣四萬錢又疑此
境天乞與壯士憔悴天應憐鴟夷古亦有獨往江
湖波濤渺翻天崎嶇世路欲脫去反以身試蛟龍
淵豈如扁舟任飄兀紅蕖綠浪搖醉眠丈夫身在

豈長棄新詩美酒聊窮年雖然不許俗客到莫惜
佳句人間傳

太白戲聖俞

開元無事二十年五兵不用太白閒太白之精下
人間李白高歌蜀道難蜀道之難難於上青天李
白落筆生雲烟千奇萬險不可攀却視蜀道猶平
川宮娃扶來白已醉醉裏詩成醒不記忽然乘興
登名山龍咆虎嘯松風寒山頭婆娑弄明月九域
塵土悲人寰吹笙飲酒紫陽家紫陽真人駕雲車

空山流水空流花飄然已去凌青霞下看區區郊
與島螢飛露濕吟秋草

答聖俞

人皆喜詩翁有酒誰肯一醉之嗟我獨無酒數往
從翁何所爲翁居南方我北走世路離合安可期
汴渠千艘日上下來及水門猶未知五年不見勞
夢寐三日始往何其遲城東賺河有名字萬家棄
水爲汙池人居其上苟賢者我視此水猶漣漪入
門下馬解衣帶共坐習習清風吹溼薪熒熒煮薄

茗四顧壁立空無遺萬錢方丈飽則止一瓢飲水
樂何涯况出新詩數十首珠璣大小光陸離他人
欲一不可有君家筐篚滿莫持才大名高乃富貴
豈比金紫包愚癡貴賤同爲一丘土聖賢獨如星
日垂道德內樂不假物猶須朋友并良時蟬聲漸
已變秋意得酒安問醇與醑玉堂官閒無事業親
舊幸可從其私與翁老矣會有幾當棄百事勤追
隨

送徐生之澠池

河南地望雄西京相公好賢天下稱吹噓死灰生
氣燄談笑暖律回嚴凝曾陪罇俎被顧盼羅列臺
閣皆名卿徐生南國後來秀得官古縣依峭陵脚
躡手板實卑賤賢雋未可吏事繩攜文百篇赴知
已西望未到氣已增我昔初官便伊洛當時意氣
尤驕矜主人樂士喜文學幕府最盛多交朋園林
相映花百種都邑四顧山千層朝行綠槐聽流水
夜飲翠幙張紅燈爾來飄流二十載髣髴蕭索垂
霜冰同時並遊在者幾舊事欲說無人應文章無

用等畫虎名譽過耳如飛蠅榮華萬事不入眼憂
患百慮來填膺羨子年少正得路有如扶桑初日
昇名高場屋已得雋世有龍門今復登出門相送
親與友何異籬鷓瞻雲鵬嗟吾筆硯久已格感激
短章因子興

春日西湖寄謝法曹歌

西湖春色歸春水綠於染羣芳爛不收東風落如
糝參軍春思亂如雲白髮題詩愁送春遙知湖上
一樽酒能憶天涯萬里人萬里思春尙有情忽逢

春至客心驚雪消門外千山綠花發江邊二月晴
少年把酒逢春色今日逢春頭已白異鄉物態與
人殊惟有東風舊相識

鷓鴣詞

龍樓鳳闕鬱崢嶸深宮不聞更漏聲紅紗蠟燭愁
夜短綠窗鷓鴣催天明一聲兩聲人漸起金井轆
轤聞汲水三聲四聲促嚴妝紅鞵玉帶奉君王萬
年枝軟風露濕上下枝間聲轉急南衙促仗三衙
列九門放鑰千官入重城禁籞鎖池臺此鳥飛從

何處來君不見潁河東岸村陂濶山禽野鳥常嘲
晰田家惟聽夏鷄聲夜夜隴頭耕曉月

射生戶

效王建作

射生戶前日獻一豹今日獻一狼豹因傷我牛狼
因食我羊狼豹誠爲害人物縣官賞之縑五疋射
生戶持縑歸爲人除害固可賞貪功趨利爾勿爲
弦弓毒矢無妄發恐爾不識麒麟兒

范純仁

龍門行

皇圖經野臨中天北有大河南陸渾陸渾之下伊
之源直走關塞侵山根此山不斷亘地軸逆爲汝
海波濤翻忽焉天意有不測齟開峽口流如吞長
波萬練卷空過貫都會洛風霆奔崖岸相嵌竦天
關此號鑿龍爲禹門石道盤紆入幽邃杉松隱映
皆祇園下窺朝市但塵土不與人世同囂喧天章
閣老真相嗣詔委北陸嚴國藩前騶驅弩聊盤桓
憑高置酒臨巖軒是月嘉平臘將盡春風料峭烟
霾昏圭陰表日景漸正玉沙透水波先溫杳杳端

闡照宸極壯以峭函周轅轅超然宴覽動咨歎坐
預國論慚冥頑乃知公旦卜洛意根本繫時亾與
存法宮在今宜有制上憲太微尊至尊乘杓布政
朝萬玉莫如洛宅當乾坤三陵氣象貫星野慶雲
祚百雲來孫豈惟設險御諸夏亦以捍患安元元
爲於可爲事乃濟器大重遷咸有言賤臣幽退冒
及此願對上前圖籍論

趙抃

送周穎之京師

吾鄉伯堅真丈夫氣剛色強言詞疎胷中一物不
使有日儲月斂惟詩書布裘落魄韋帶緩權門不
肯低眉趨朋游累百誰爾汝人皆不與爭挪揄掩
關斲菽苦意氣糞壤玉壁泥沙珠宣慈中山我孤
處昨日走介遺吾書書云詔下顓俊父兄命穎
之京都古人求養志擇祿今爾豈得逃馳驅肩書
手劍出門去濟咨肯復兒女如我聞此語涕交下
人皆欲養繫我無羨子之爲與道合勸子亟往無
踟躕

司馬光

和王介甫巫山高

巫山高巫山之高高不極寒江西來曳長練羣峯
森羅十二戟清猗悲號裂翠崖老蛟怒鬪摧丹壁
輕生重利三巴客一葉直衝高浪白船頭吟嘯坐
自如仰視長天不盈尺叢祠象設儼山椒巫祝紛
紛非一朝云是高唐神女之所處至今暮雨常蕭
蕭我聞神理明且直興亾惟觀惡與德安肯來從
楚國君憑依夢寐爲淫昏襄王之心自荒惑引領

日望陽臺雲獨不思懷王西行不復返甲光照地
屯秦軍蠶食黔中下荆門陵園宗廟皆燒焚社稷
飄零不復存嗟嗟若敖蚡冒世算路藍縷皆辛勤

憶同尋上陽故宮路

上陽門外雲連草車馬遙遙往來道昔王遊豫幾
何年今人豈識當時好明珠翠羽已成塵道上行
人幾番老當時秋雨落宮槐今此婆娑皆合抱

韓維

和原甫去年對雪思梅今年對梅思雪

中州寒燠與南異常恨梅花開不早今年朔雪冬
不飛臘月繁英似南好君憐芳物感時節愁見高
風凍雲掃苦嗟十九不稱意徒自令人顏色老雪
遲梅早非我力會使金樽日傾倒

奉同原甫賦澄心堂紙

江南國土未破前澄心名紙世已傳高堂久傾不
復見誰謂此物猶依然當時萬杵搗雲葉鋪出几
案滑且堅剡溪藤骨不足數蜀江玉膚誰復憐君
臣嬉燕盛文采駢章儷曲鬪巧儗一朝零落隨地

放中原篋笥生光鮮君安得此尙百幅題以大句
先羣賢羣賢落筆富精麗瓊瑤寶玦相鈎聯嗟子
材力豈當敵雖欲強賦何能妍耽獨玩物古所戒
崇尙浮藻政豈先江南可哀紙可惜後有觀者存
吾篇

積書巖宋詩刪第八卷目錄

七言古詩二

蘇洵 一首

李觀 一首

徐積 二首

張載 一首

劉敞 二首

范祖禹 一首

王令 一首

王安石 十七首

曾鞏 二首

蘇軾 二十四首

蘇轍 四首

文同 二首

沈遼 二首

沈括 一首

李育一首

積書巖宋詩刪卷八

錫山顧貞觀梁汾選

武陵胡獻徵存人閱

七言古詩二

蘇洵

丙申歲余在京師鄉人陳景回自南來棄其官得太子中允景回舊有地在蔡今將治園囿於其間以自老余嘗有意於嵩山之下洛水之上買地築室以爲休

息之館而未果今景回欲余詩遂道此
意景回志余言異日可以知余之非戲

云爾

岷山之陽土良腴江水清滑多鯉魚古人居之富
者衆我獨厭倦思移居平川如手山水蹙恐我後
世鄙且愚經行天下愛嵩嶽遂欲買地居妻孥晴
原漫漫望不盡山色照衣光如濡民生舒緩無天
札衣冠堂堂偉丈夫吾今隱居未有所更後十載
不可無聞君厭蜀樂上蔡占地百頃無邊隅草深

野濶足狐兔水種陸取身不劬誰如李斯顧秦寵
不獲牽犬追黃狐今君南去已足老行看嵩少當
吾廬

李觀

答緣槩師見示草書千字文并石公所贈

詩序

佛由西域漸中土欲使羣心皆鼓舞若顓楚語及
胡書昧者雖存明孰與其徒往往多材能暗結時
賢爲外助遠公自昔來廬山誇逞蓮花邀社侶吁

嗟君子遭亂邦舍此未知何處去邇來一行善記
覽齧破乾坤尋曆數或攻文苑掠芬香辭則貫休
筆懷素其餘曲藝與小詩布在人間難悉數賢豪
大抵多憐才引致門牆無齟齬其人既重法亦尊
羽翼大成根本固我緣山谷見不遠緇褐憧憧盡
愚魯坐量此去朋黨衰織縞焉能拒強弩去年有
使自鄱陽手籍一函來我所發函乃是緣槩書千
字滿前雲縷縷衆人飽食已用心欲噍伯英肥美
處當時名士嘉其能長序短篇聯繡組因心幅員

千萬里如師之能更幾許以儒輔釋日益多何惜
區區一韓愈

徐積

送王潛聖

公車待報凡幾年蕭生罷去心浩然鹽瀆野中尋
舊隱揚子江頭呼渡船太湖波浪溼秋天洞庭橘
柚生紅烟馬踏新霜吳嶺外猿啼小雪建溪邊關
西夫子雖遲暮行笑行吟正安步菑川海上牧羊
兒解說公孫放豚處

送端叔

夜漏將盡枕上再送端叔也洛水之陽馬上爲
我誦此詩卽此詩用木葉書投之水中便爲將
來故事也延安塞上見羣雁能爲我誦此詩東
南望否夜半枕上聞孤雁聲尤數數誦此詩也
紙窮意未盡

端叔上馬去巷口馬頭轉我喚端叔時端叔急回
面記取此時意莫使落風埃上東門外水正望楚
州來此水一來不復見不及黃沙塞頭雁

張載

宿興慶池通軒示同志

清湘庭下千竿竹百尺斑斕聳蒼玉通軒軒外萬
頃陂陂接南山天與齊唐基一壞半禾黍舉目氣
象增愁思我來正當搖落時塵埃七日無人知東
平叔子信余友問學不厭堅相隨君莫痛兮鳳沼
湮又莫悲兮花萼墮所憂聖道久榛塞富貴浮雲
眼空過明發余西叔且東高談更爲通宵坐

劉敞

荒田行

大農棄田避征役小農挈家就兵籍良田茫茫少
耕者秋來雨止生荆棘縣官募兵有著令募兵如
足官胥慶從今無復官勸農還逐魚鹽作亾命

上書行

仕不至二千石賈不至五百萬此事夸者憂而非
志士歎君不見下邳少年受書起幄中運籌制千
里功成不受二萬戶拂衣歸從赤松子君不見計
倪半策誅強吳鳴夷扁舟遊五湖三致千金不自

擅至今籍籍宗陶朱大賢富貴不爲已心事逸與
常人殊逢時致身如反手雲蒸龍變無時無君勿
愛上書獻賦稱賢豪刺繡倚市相矜高丈夫昔曾
笑徒勞商賈旦旦爭錐刀

范祖禹

月夜船行入資州

憶昨臥碧山蒼蒼叢桂間白雲爲屏石爲枕綠蘿
長挂明月閑忽乘輕舟泛江水山月隨人還在此
白鷺驚飛宿靄前青山倒臥滄波底此時孤棹發

中流川后停波聽棹謳不學子猷中夜返却乘明
月向資州

王令

送曹杜赴試禮部

霜風琅琅鳴鼓輦烏寒夜噪樹折枝居者不出行
者歸廐馬解銜車棄脂長河夜水船就維百賈晏
起朝閉扉爲問當今行者誰出門千里到何時母
送拊背父嘆嘻兒惜欲去哭挽衣上馬反顧紛涕
洟非所願欲去何爲家雖有田豐歲稀所得償公

不及私况望羶腥事庭鬪結髮從學今十暮始自
有志徇孔姬豈願從世成依違高堂華髮紆素絲
暮年待子爲光輝望我日久莫報之苟得一笑辱
弗辭况望三釜家無饑吾于二子久所知怪其才
高所就卑今乃語此誠可悲近聞天子變典彝欲
撥舊冗收新奇子行出仕適其期驂駟得路無銜
羈罷酒行矣無自遲去取天寵酬親慈

王安石

明妃曲

明妃初出漢宮時淚濕春風鬢脚垂低徊顧影無
顏色尚得君王不自持歸來却怪丹青手人眼平
生幾曾有意態由來畫不成當時枉殺毛延壽一
去心知更不歸可憐著盡漢宮衣寄聲欲問塞南
事只有年年鴻雁飛家人萬里傳消息好在羶城
莫相憶君不見咫尺長門閉阿嬌人生失意無南
北

君難託

槿花朝開暮還墜妾身與花寧獨異憶昔相逢俱

少年兩情未許誰最先感君綢繆逐君去成君家
計良辛苦人事反覆那能知讒言入耳須與離嫁
時羅衣羞更著如今始悟君難託妾亦不忘舊時
約

飛雁

飛雁冥冥時下泊稻梁雖少江湖樂人生何必慕
輕肥辛苦將身到沙漠漢時蘇武與張騫萬里生
還值偶然丈夫許國當如此男子辭親亦可憐
葛蘊作巫山高愛其飄逸因亦作一篇

巫山高偃薄江水之滔滔水於天下實至險山亦
起伏爲波濤其巔冥冥不可見崖岸斗絕悲猿猱
赤楓青櫟生滿谷山鬼白日樵人遭窈窕陽臺彼
神女朝朝暮暮能雲雨以雲爲衣月爲褚乘光服
暗無留阻崑崙會城道可取方丈蓬萊多伴侶塊
獨守此嗟何求况乃低徊夢中語

孤城

孤城回望距幾何記得好處常經過最思東山烟
樹色更憶南湖秋水波百年顛倒如夢寐萬事乖

隔徒悲歌應須飲酒不復道今夜江頭明月多

出鞏縣

昭陵落月烟霧昏篝火度谷行山根投鞭委轡涉
數村寤出鞏縣城東門向來宮闕不可見但有洛
水流渾渾

明州錢君倚衆樂亭

使君幕府開東部名高海曲人知慕艤船談笑政
卽成洗滌山川作嘉趣平泉浩蕩銀河注想見明
星弄機杼載沙築城天上路投虹爲橋取孤嶼掃

除荆棘水中央碧瓦朱甍隨指顧春風滿城金版
舫來看置酒新亭上百女吹笙綵鳳悲一夫伐鼓
靈鼉壯安期羨門相與遊方丈蓬萊不可求酒酣
忽跨鯨魚去陳迹空令此地留

九井

沿崖涉澗三十里高下犖确無人耕捫蘿挽葛到
山趾仰見吹瀉何崢嶸餘聲投林欲風雨未勢卷
土猶溪阮飛蟲凌兢走獸慄霜雪夏落雷冬鳴野
人往往見神物鱗甲漠漠雲隨行我來立久無所

得空數石上菖蒲生中官繫龍沉玉冊小吏磔狗
澆銀觥地形偶爾藏險怪天意未必司陰晴山川
在理有崩竭丘壑自古相虛盈誰能保此千世後
天柱不折泉常傾

寄朱昌叔

西安春風花幾樹花邊飲酒今何處一盃塞上看
黃雲萬里寄聲無雁去世事紛紛洗更新老來空
得滿衣塵青山欲買江南宅歸去相招有此身

純甫出釋惠崇畫要予作詩

畫史紛紛何足數惠崇晚出吾最許早雲六月漲
林莽移我修然墮洲渚黃蘆低摧雪翳土鳧雁靜
立將儔侶往時所歷今在眼沙平水澹西江浦暮
氣沈舟暗漁罟欹眠嘔軋如聞榜頗疑道人三昧
力異域山川能斲取方諸承水調幻藥灑落生綃
變寒暑金陵巨然山數堵粉墨空多真漫與大梁
崔白亦善畫曾見桃花淨初吐酒酣弄筆起春風
便恐漂零作紅雨鶯流深枝婉欲語蜜蜂掇藥隨
翅股一時二子皆絕藝裘馬穿羸久羈旅華堂豈

惜萬黃金苦道今人不如古

杭州修廣師法喜堂

浮屠之法與世殊洗滌萬事求空虛師心以此不
挂物一堂收身自有餘堂陰置石雙甍嶮石脚立
竹青扶疎一來已覺肝膽豁况乃宴坐窮朝晡憶
初救時勇自許壯大看俗尤崎嶇豐車肥馬載豪
傑少得志願多憂虞始知進退各有理造次未可
分賢愚會將築室返耕釣相與此處吟山湖

復至曹娥堰寄剡縣丁元珍

溪水渾渾來自北千山抱水清相射山深水急無
艇子欲從故人安可得故人昔日此水上罇酒扁
舟慰行役津亭把手坐一笑我喜滿懷君動色論
新講舊惜未足落日低徊已催客離心自醉不復
飲秋果寒花空滿席今年却坐相逢處悵悵難求
別時迹可憐溪水自南流安得溪船問消息

陶縝菜

江南種菜漫阡陌紫芥綠菘何所直陶生畫此共
言好一幅往往黃金百北山老圃不外慕但守荒

畦斲荆棘陶生養目渠養腹各以所能爲物役

張良

留侯美好如婦人五世相韓韓入秦傾家爲主合
壯士博浪沙中擊秦帝脫身下邳世不知舉國大
索何能爲素書一卷天與之穀城黃石非吾師固
陵解鞍聊出口捕取項羽如嬰兒從來四皓招不
得爲我立棄商山芝洛陽賈誼才能薄擾擾空令
絳灌疑

楊雄

子雲平生人莫知知者乃獨稱其辭今尊子雲者
皆是得子雲心亦無幾聖賢樹立自有師人知不
知無以爲俗人賤今常貴古子雲今存誰女數

雲山詩送正之

雲山參差碧相圍溪水詰曲帶城陴溪窮壤斷至
者誰子獨與子相諧熙山城之西鼓吹悲水風蕭
蕭不滿旗子今去此來無時子有不可誰子規

收鹽

州家飛符來比櫛海中收鹽今復密窮愁破屋正

嗟歛吏兵操舟去復出海中諸島古不毛島夷爲
生今獨勞不煎海水餓死爾誰官坐守無亾逃爾
來賊盜往往有劫殺賈客沈其艘一民之生重天
下君子忍與爭秋毫

曾鞏

明妃曲

蛾眉絕世不可尋能使花羞在上林自信無由污
白玉向人不肯用黃金一辭椒屋風塵遠去託羶
廬沙磧深漢姬尚自有妒色胡女豈能無忌心直

欲輸情通漢地獨能將恨寄胡琴但取當時能託
意不論何代有知音長安美人誇富貴未央宮殿
競光陰豈知泯泯沈烟霧獨有明妃傳至今

南湖行

東南溪水來何長若耶空明宜靚妝南湖一吸三
百里古人已疑行鏡裏春風來吹不生波畫壁如
奩四邊起蒲芽荇蔓自相依躑躅天桃開滿枝求
羣白鳥映沙去接翼黃鸝穿樹飛我坐荒城苦卑
溼春至花開曾未知蕩槳如從武陵入千花百草

使人迷山回水轉不知遠手中紅螺豈須勸輕舟
短棹此溪人相要水上亦湔裙家住橫塘散時晚
分明笑語隔溪聞

蘇軾

孫莘老求墨妙亭詩

蘭亭繭紙入昭陵世間遺跡猶龍騰顏公變法出
新意細筋入骨如秋鷹徐家父子亦秀絕字外出
力中藏稜嶧山傳刻典刑在千載筆法留陽冰杜
陵評詩貴瘦硬此論未公吾不憑短長肥瘠各有

熊玉環飛燕誰敢憎吳興太守真好古購買斷缺
揮縑繪龜趺入坐螭隱壁空齋晝靜聞登登奇蹤
散出走吳越勝事傳說誇友朋書來乞詩要自寫
爲把栗尾書谿藤後來視今猶視昔過眼百世如
風燈他年劉郎憶賀監還道同時須伏膺

贈寫御容妙善師

憶昔射策干先皇珠簾翠幄分兩廂紫衣中使下
傳詔跽捧再拜闡天香仰觀絃冕日生暈但見曉
色開扶桑迎陽緩出步就坐絳紗玉斧光照廊野

夢橋山松檜淒風霜天容玉色誰敢画老師古寺
晝閉房夢中神授心有得覺來信手筆已忘幅中
常服儼不動孤臣入門滄自滂元老侑坐鬚眉古
虎臣立侍冠劍長平生慣寫龍鳳質宥顧草間猿
與麀都人踏破鐵門限黃金白壁空堆牀爾來摹
寫亦到我謂是先帝白髮郎不須覽鏡坐自了明
年乞身歸故鄉

虢國夫人夜遊圖

佳人自鞚玉花驄翩如驚燕踏飛龍金鞭爭道寶

釵落何人先入明光宮宮中羯鼓催花柳玉奴絃
索花奴手坐中八姨真貴人走馬來看不動塵明
眸皓齒復誰見只有丹青餘淚痕人間俯仰成今
古吳公臺下雷塘路當時一笑潘麗華不知門外
韓擒虎

大雪獨留尉氏

古驛無人雪滿庭有客冒雪來自北紛紛笠上已
盈寸下馬登堂面蒼黑苦寒有酒不能飲見之何
必問相識我酌徐徐不滿觥看客倒盡不流濕干
門盡閉行路絕相與笑語不知夕醉中不復問姓
名上馬忽去橫短策

用韻答西掖諸公

雙蛻蟠礎龍纏棟金井輓轡鳴曉壑小殿垂簾白
玉鉤大宛立仗朱絲鞵風馭賓天雲雨隔孤臣忍
淚肝腸痛羨君意氣風生座落筆縱橫盤走汞上
樽日日瀉黃封賜茗時時開小鳳閉門憐我老太
玄給札看君賦雲夢金奏不知江海眩木瓜屢費
瓊瑤重豈惟蹇步困追攀已覺侍史疲奔送春還

宮柳腰支活水入御溝鱗甲動借君妙語發春容
顧我風琴不成弄

十一月二十六日松風亭下梅花盛開

春風嶺上淮南村昔年梅花曾斷魂豈知流落復
相見蠻風蠻雨愁黃昏長條半落荔枝浦臥樹獨
秀桄榔園豈惟幽光留夜色直恐冷豔排冬溫松
風亭下荆棘裏兩株玉蘂明朝暎海南仙雲嬌墮
砌月下縞衣來扣門酒醒夢覺起繞樹妙意有在
終無言先生獨飲勿歎息幸有落月窺清樽

與子由別於鄭州西門之外馬上賦詩一

篇別後寄之

不飲胡爲醉兀兀此心已逐歸鞍發歸人猶自念
庭闈今我何以慰寂寞登高回首坡隴隔惟見烏
帽出復沒苦寒念爾衣裘薄獨騎瘦馬踏殘月路
人行歌居人樂僮僕怪我苦悽惻亦知人生要有
別但恐歲月去飄忽寒燈相對記疇昔夜雨何時
聽蕭瑟君知此意不可忘慎勿苦愛高官職

李思訓畫長江絕島圖

山蒼蒼水茫茫小孤大孤江中央崖崩路絕猿鳥
去惟有喬木攬天長客舟何處來棹歌中流時抑
揚沙平水遠望不到孤山久與船低昂峩峩兩烟
鬟曉鏡開新妝舟中賈客莫漫狂小姑前年嫁彭
郎

書王定國所藏烟江疊嶂圖王晉卿書

江上愁心千疊山浮空積翠如雲烟山耶雲耶遠
莫知烟空雲散山依然但見兩崖蒼蒼暗絕谷中
有百道飛來泉縈林絡石隱復見下赴谷口爲奔

川川平山開林麓斷小橋野店依山前行人稍度
喬木外漁舟一葉江吞天使君何從得此本點綴
毫末分清妍不知人間何處有此境徑欲往置二
頃田君不見武昌樊口幽絕處東坡先生留五年
春風搖江天漠漠暮雲卷雨山娟娟丹楓翻鴉伴
水宿長松落雪驚醉眠桃花流水在人世武陵豈
必皆神仙江山清空我塵土雖有去路尋無緣還
君此畫三歎息山中故人應有招我歸來篇

申王畫馬圖

天寶諸王愛名馬千金爭致華軒下當時不得玉
花驄飛電流雲絕瀟灑兩坊歧薛寧與申馮凌內
廐多清新肉髮汗血盡龍種紫袍玉帶真天人驪
山射獵包原隰御前急詔穿圍入揚鞭一蹙破霜
蹄萬騎如風不能及雁飛兔走驚絃開翠華按轡
從天回五家錦繡遍山谷百里舄珥遺織埃青驪
蜀棧兩超忽高準濃蛾散荆棘苜蓿連天鳥自飛
五陵佳氣春蕭瑟

遊徑山

衆峯來自天目山勢若駿馬奔平川中塗勒住千
里足金鞭玉韉相迴旋人言山住水亦住下有萬
古蛟龍淵道人天眼識王氣結茅晏坐荒山巔精
神貫山石爲裂天女下試顏如蓮寒窗暖足來撲
渥夜鉢咒水降蜿蜒雪眉老人朝扣門願爲弟子
長參禪爾來興廢三百載奔走吳會輸金錢飛樓
湧殿壓山破朝鐘暮鼓驚龍眠晴空仰見浮海蜃
落日下數投村鳶有生共處覆載內擾擾膏火相
烹煎近來愈覺世路隘每到寬處差安便嗟余老

矣百事廢却尋舊學心茫然問龍乞水歸洗眼欲
看細字銷殘年

遊道場山何山

道場山頂何山麓上徹雲峯下幽谷我從山水窟
中來尙愛此山看不足陂湖行盡白漫漫青山忽
作龍蛇盤山高無風松自響誤認石齒號驚湍山
僧不放山泉出屋底清池照瑤席階前合抱香入
雲月裏仙人親手植出山回望翠雲鬟碧瓦朱欄
縹緲間白水田頭問行路隔溪深處是何山高入
山中對酒空三歎

芙蓉城

世傳王迥子高與仙人周瑤英遊芙蓉城元豐
三年三月余始識子高問之信然乃作此詩極
其情而歸之正亦變風止乎禮義之意也

芙蓉城中花冥冥誰其主者石與丁珠簾玉案翡
翠屏雲舒霞卷何娉婷中有一人長眉青炯如微
雲淡疎星往來三世空鍊形竟坐誤讀黃庭經天

門夜開飛爽靈無復白日乘雲輶俗緣千劫磨不
盡翠被冷落淒餘馨因過緱山朝帝廷夜聞笙簫
弭節聽飄然而來誰使令皎如明月入窗櫺忽然
而去不可執寒衾虛幌風泠泠仙宮洞房本不扃
夢中同躡鳳皇翎徑度萬里如奔霆玉樓浮空聳
亭亭天書雲篆誰所銘遶樓飛步高矰岬仙風鏘
然韻流鈴籊籊典闌如酒醒芳卿寄謝空丁寧一
朝覆水不反瓶羅巾別淚空熒熒春風花開秋葉
零世間羅綺紛羶腥此生流浪隨滄溟偶然相值

兩浮萍願君收視觀三庭勿與佳穀生蝗螟從渠
一念三千齡下作人間尹與邢

送安惇秀才失解西歸

舊書不厭百回讀熟讀深思子自知他年名宦恐
不免今日棲遲那可追我昔家居斷還往著書不
復窺園葵竭來東遊慕人爵棄去舊學從兒嬉狂
謀謬算百不遂惟有霜鬢來如期故山松柏皆手
種行且拱矣歸何時萬事早知皆有命十年浪走
寧非癡與君未可較得失臨別惟有長嗟咨

武昌西山

嘉祐中翰林學士承旨鄧公聖求爲武昌令常遊寒溪西山山中人至今能言之軾謫居黃岡與武昌相望亦常往來溪山間元祐元年十一月二十九日考試館職與聖求會宿玉堂偶話舊事聖求嘗作元次山窪樽銘刻之巖石因爲此詩請聖求同賦當以遺邑人使刻之銘側

春江綠漲蒲萄醅武昌官柳知誰栽憶從樊口載春酒步上西山尋野梅西山一上十五里風駕兩

腋飛崔嵬同遊困臥九曲嶺褰衣獨到吳王臺中原北望在何許但見落日低黃埃歸來解劍亭前路蒼崖半入雲濤堆浪翁醉處今安在石臼杯飲無尊罍爾來古意誰復嗣公有妙語留山隈至今好事除草棘常恐野火燒莓苔當時相望不可見玉堂正對金鑿開豈知白首同夜直臥看椽燭高花摧江邊曉夢忽驚斷銅環玉鑰鳴春雷山人帳空猿鶴怨江湖水生鴻雁來請公作詩寄父老往和萬壑松風哀

渚宮

渚宮寂寞依古郢楚地茫茫非故基二王臺閣已
鹵莽何況遠問縱橫時楚王獵罷擊靈鼓猛士操
舟張水嬉釣鼈不復數魚鱉大鼎千石烹蛟螭當
時郢人架宮殿意思妙絕般與倕飛樓百尺照湖
水上有燕趙千蛾眉臨風揚揚意自得嘗使宋玉
作楚詞秦兵西來取鐘簋故宮禾黍秋離離千年
壯觀不可復今之存者蓋已卑池平野迴樓閣小
惟有深竹藏狐狸臺中絳帷誰復見臺下野鴨浮

清漪綠窗朱戶春晝閉想見深屋彈朱絲腐儒亦
解愛聲色何用白首談孔姬沙泉半涸草堂在破
窗無紙風颼颼陳公蹤跡最未遠七瑞寥落今何
之百年人事知幾變直恐荒廢成空陂誰能爲我
訪遺跡草中應有湘東碑

過江夜行武昌山上聞黃州鼓角

清風弄水月銜山幽人夜渡吳王峴黃州鼓角亦
多情送我南來不辭遠江南又聞出塞曲半雜江
聲作悲健誰言萬方聲一槩鼉憤龍愁爲余變我

記江邊枯柳樹未死相逢重識面他年一葉泝江
來還吹此曲相迎餞

同正輔表兄游白水山

偉哉造物真豪縱攫土搏沙爲此弄擘開翠峽走
雲雷截破奔流作潭洞因隨化人履巨跡得與仙
兄攝飛鞚曳杖不知巖谷深穿雲但覺衣裘重坐
看驚鳥投霜葉知有老蛟蟠石甕金沙玉礫粲可
數古鏡寶奩寒不動念兄獨立與世疎絕境難到
惟我共永辭角上兩蠻觸一洗胷中九雲夢浮來

山高回望失武陵路絕無人送筠籃擷翠爪甲香
素縷分碧銀餅凍歸路霏霏湯谷暗野堂活活神
泉涌解衣浴此無垢人身輕可是雲間鳳

法惠寺橫翠閣

朝見吳山橫暮見吳山縱吳山故多態轉側爲君
容幽人起朱閣空洞更無物惟有千步岡東西作
簾額春來故國歸無期人言悲秋春更悲已泛平
湖思濯錦更看橫翠憶蛾眉瑀欄能得幾時好不
獨憑欄人易老百年興廢更堪哀懸知草莽化池

臺游人尋我舊游處但覓吳山橫處來

遊金山寺

我家江水初發源宦遊直送江入海聞道潮頭一
丈高天寒尙有沙痕在中冷南畔石盤陀古來出
沒隨濤波試登絕頂望鄉國江南江北青山多羈
愁畏晚尋歸楫山僧苦留看落日微風萬頃韡文
細斷霞半空魚尾赤是時江月初生魄二更月落
天深黑江心似有炬火明飛燄照山棲鳥驚悵然
歸臥心莫識非鬼非人竟何物江山如此不歸山

江神見慣驚我頑我謝江神豈得已有田不歸如

江水

是夜所見如此

和子由中秋見月

明月未出羣山高瑞光千丈生白毫一杯未盡銀
闕湧亂雲脫壞如崩濤誰爲天公洗眸子應費明
河千斛水遂令冷看世間人顧我湛然心不起西
南大星如彈丸角尾奕奕蒼龍蟠今宵注眼看
不見更許螢火爭清寒何人艤舟臨古汴千燈夜作
魚龍變曲折無心逐浪花低昂赴節隨歌板

是夜賈客

舟中放水燈

青熒滅沒轉前山浪颭風迴豈復堅明月

易低人易散歸來呼酒更重看堂前月色愈清好
咽咽寒螿鳴露草卷簾推戶寂無人窗下唧啞惟
楚老近有一孫名楚老南都從事莫羞貧對月題詩有幾
人明朝人事隨日出恍然一夢瑤臺春

韓幹十四馬

二馬並驅攢八蹄二馬宛頸鬣尾齊一馬任前雙
舉後一馬却避長鳴嘶老髯奚官騎且顧前身作
馬通馬語後有八匹飲且行微流赴吻若有聲前
者既濟出林鶴後者欲涉鶴俛啄最後一匹馬中
龍不嘶不動尾搖風韓生畫馬真是馬蘇子作詩
如見畫世無伯樂亦無韓此詩此畫誰當看

月兔茶

環非環玦非玦中有迷離玉兔兒一似佳人裙上
月月圓還缺缺還圓此月一缺圓何年君不見關
茶公子不忍鬪小團上有雙銜綬帶雙飛鸞

眉子硯歌

君不見成都畫手開十眉橫雲却月爭新奇遊人

指點小頓處中有漁陽胡馬嘶又不見王孫青瑣
橫雙碧腸斷浮空遠山色書生性命何足論坐費
千金買消渴邇來喪亂愁天公謫向君家書硯中
小窗虛幌相嫵媚令君曉夢生春紅毘耶居士談
空處結習已空花不住試教天女爲磨鉛千偈瀾
翻無一語

蘇轍

中秋見月寄子瞻

西風吹暑天益高明月耿耿分秋毫彭城閉門青

嶂合臥聽百步鳴飛濤使君攜客登燕子月色著
人冷如水筵前不設鼓與鐘處處笛聲相應起浮
雲卷盡流金丸戲馬臺西山鬱蟠盃中滌酒一時
盡衣上白露三更寒

將築南屋借功田家

先人敝廬寄西南不歸三紀今何堪卜營菟裘閱
歲三西成黍豆餘石甌借功田家并鑿杵農事未
起來不嫌併遣浮客從丁男苾鞵禿巾短後衫杵
聲登登駭閭閻期我一月久不厭我方窮困人所

諸有求不答心自甘一言見許非妄談飲汝信厚
心懷慚晨炊暮餉增醯鹽歸時無礙田與蠶

司馬君實端明獨樂園

子磋丘中親執麻邵平東陵親種瓜公今東去事
農圃亦種洛陽千本花修篁遶屋韻寒玉平泉入
畦紆臥蛇錦屏奇種斲巖竇高高靈藥移萌芽城
中三月花事起肩輿遍入公侯家淺紅深紫相媚
好重樓多葉爭矜誇一枝盈尺不論價十千斗酒
那須賒歸來曳履苔逕滑醉倒閉門春日斜

王詵都尉寶繪堂詞

侯家玉食繡羅裳彈絲吹竹喧洞房哀歌妙舞奉
清觴白日一醉萬事忘百年將種存慨慷西取庸
蜀踐戎場戰袍賜錦盤鵬章寶刀玉玦餘風霜功
臣子孫白晳長朱門甲第臨康莊生長介冑羞膏
梁四方賓客坐華堂何用爲樂非笙簧錦囊犀軸
堆象牀竿叉連幅翻雲光手披橫素風飛揚長林
巨石插雕梁清江白浪吹粉牆異花沒骨朝露香
驚禽猛獸舌齧張騰踏蹶裊聯驩驩噴振風雨馳

平岡前數顧陸後吳王老成雖喪存典常坐客不
識視茫洋卷舒終日未用忙遊意淡泊心清涼香

文同

採藥歸晚因宿野人草舍

東陟陰深崖巘古夾澗垂泉結鷺乳我來採藥晚
忘歸試宿荆扉問雞黍春風滿林燈火冷一夜不
眠山月苦平明攜策下青蒼松葉紛紛灑新雨

晚至村家

高原礪确石徑微籬落明滅餘殘暉舊裙飄風採

桑去白袷卷水秧稻歸深葭繞澗牛散臥積麥滿
場雞亂飛前谿後谷暝烟起稚子各出關柴扉

沈遼

龜茲舞

龜茲舞龜茲舞始自漢時入樂府世上誰傳此樂
名不知此樂猶傳否黃扉朱邸晝無事美人親尋
教坊譜衣冠盡得画图看樂器多因西域取紅綠
結襖坐後部長笛短簫形製古雞婁指鼓舊所識
饒貝流蘇分白羽玉顏二女高髻花孔雀羅衫金

畫縷紅鞵玉帶踏筵出初驚翔鸞下玄圃中有一
人奏羯鼓頭如山兮手如雨其間曲調雜晉楚歌
詞至今傳晉語須臾曲罷立前廡歎息平生未嘗
睹清都閬苑昔有夢寂寞如今在何所我家家住
江海涯上國樂事殊未知玉顏邀我索題詩它時
有夢與誰期

贈別子瞻

平生雅遊眉陽客五年不見鬚已白借田東坡在
江北芟夷蓬蒿自種麥相逢不盡一樽酒故態那

復論歡戚手抱阿武勸餘瀝維摩老夫失定力老
夫寂寂出三湘更欲卜居池水陽薄田止須數十
畝田上更樹麻與桑老來正苦迫生事清明雖近
猶未秧罷亞若可博乾麩以無易有逢相望我舟
卽行不得駐欲卜後會誠茫茫他時有信如相寄
不用辛苦爲詩章

沈括

江南曲

新秋拂水無行迹夜夜隨潮過江北西風卷雨上

半天渡口微涼含晚碧城頭鼓響日脚垂天際籠
烟鎖山色高樓索莫臨長陌黃竹一聲無北客時
平田苦少人耕惟有蘆花滿江白

李育

飛騎橋

孫權爲張遼所襲乘駿馬上津橋板撤丈餘超度得免

魏人野戰如鷹揚吳人水戰如龍驤氣吞魏土惟
吳王建旗敢到新城傍霸主身當萬夫敵麾下倉
皇無羽翼途窮事變接短兵生死之間不容息馬
奔津橋橋半撤洶洶有聲如地裂蛟怒橫飛秋水

空鷲驚徑度秋雲缺奮迅金羈汗濡臆濟主艱難
天借力艱難始是報恩時平日主君須愛惜

積書巖宋詩刪第九卷目錄

七言古詩三

黃庭堅 六首

陳師道 二首

孔武仲 二首

孔平仲 六首

張舜民 一首

張耒 九首

秦觀 三首

晁補之 四首

晁冲之 四首

米芾 一首

郭祥正 二首

李廌 一首

賀鑄 二首

劉夙 一首

楊時 三首

謝逸 一首

周紫芝 一首

韓駒 六首

唐庚 二首

崔鷗 一首

孫覲 三首

積書巖宋詩刪卷九

錫山顧貞觀梁汾選

武陵胡獻徵存人閱

七言古詩三

黃庭堅

次韻子瞻送李廌

騏子墮地追風日未試千里誰能識習之實錄葬
皇祖斯文如女有正色今年持橐佐春官遂失此
人難塞責雖然一闕有奇耦博懸於投不在德君

看巨浸朝百川此豈有意潢潦前願爲霧豹懷文
隱莫愛風蟬蛻骨仙

觀劉永年團練畫角鷹

劉郎才勇世無敵愛畫工夫亦成癖弄筆掃成蒼
角鷹殺氣稜稜動秋色爪拳金鉤背屈鐵萬里風
雲藏勁翮兀立槎枒不畏人眼看青冥有餘力霜
飛晴空塞草白雲垂四野陰山黑此時軒然盍飛
去何乃噴吭立西壁祇應真骨下人世不謂雄姿
留粉墨造次更無高鳥喧等閒亦恐狐狸嚇旁觀

未必窮神妙乃是天機貫胸臆瞻相突兀摩空材
想見其人英武格傳聞揮毫頗容易持以與人無
甚惜物逢真賞世所珍此畫他年恐難得

伯時彭蠡春牧圖

岳陽樓上春已歸湖中鴻雁拍波飛布帆天濶從
鳥道石林風晚吹人衣春水初生及馬腹浮灘欲
上西山麓遙看絕嶺秀雲松上有垂蘿暗溪谷沙
眠草嚙性不驕側身注目鳴相招林間瞥過星爍
爍原上獨立風蕭蕭君不見中原真種烟塵沒南

行市骨何倉卒祗收力健載征夫宵向時危辨奇
骨卽今貢馬西北來東西坊監屯雲開紛然駑驥
同一秣爾可不憂四蹄脫

次韻子瞻題郭熙畫秋山

黃州逐客未賜環江南江北飽看山玉堂臥對郭
熙畫發興已在青林間郭熙官畫但荒遠短紙曲
折開秋晚江村烟外雨脚明歸雁行邊餘疊巘坐
思黃甘洞庭霜恨身不如雁隨陽熙今頭白有眼
力尚能弄筆映窗光畫取江南好風日慰此將老

鏡中髮但熙官畫寬作程十日五日一水石

雙井茶送子瞻

人間風月不到處天上玉堂森寶書想見東坡舊
居士揮毫百斛瀉明珠我家江南摘雲腴落磴霏
霏雪不如爲公喚起黃州夢獨載扁舟向五湖

和謝公定征南謔

傳聞交州初陸梁東連五溪西氏羌軍行不斷蠻
標質謀主皆收漢畔亾合浦譙門腥血沸晉興城
下白骨荒謀臣異時坐致寇守臣今日愧包桑已

遣戈船下灘水更分樓船浮豫章頗聞師出三鶚
路盡是中屯六郡良漢南食麥如食玉湖南驅人
如驅羊營平請穀三百萬祁連引兵九千里少府
私錢不可知大農計歲今餘幾土兵番馬貔虎同
蝮蛇毒草篁竹中未論芻粟捐金費直愁瘴癘連
營空我思荊州李太守欲募蠻丁令自攻至今民
歌尹殺我州郡擇人誠見功張喬祝長不難得誰
借前箸開天聰詔書哀痛言語切爲民一洗橫尸
血摧鋒陷堅賞萬戶塹山堙谷窮三穴南平舊時

頗臣順欲獻封疆請旄節廟謀猶計病中原豈知
一朝更屠滅天道從來不爭勝功臣好爲可喜說
交州雞肋安足貪漢開九郡勞臣監呂嘉不肖佩
銀印微側持戈敵百男君不見往年瀕海未郡縣
趙陀閉關罷朝獻老翁竊帝聊自娛白頭抱孫思
事漢孝文親遣勞苦書稽首請去黃屋車得一匹
十終不忍太宗之仁千古無

陳師道

謝趙使君送烏薪

欲落未落雪近人將盡不盡冬歷春風枝冰瓦有
去鳥遠坊窮巷無來人忽聞叩門聲遽速驚雞透
籬犬升屋使君傳教賜薪炭妓圍那解思寒谷老
身曲直不足云冷窗凍壁作春溫定知和氣家家
到不獨先生雪塞門

古墨行

晁無斃見李墨半丸云裕陵故物也往於秦少
游家見李墨不爲文理質如金石乃裕陵所賜
王平甫所藏者潘谷見之再拜云真廷珪所作

也世惟王四學士有之與此爲二矣嗟乎世不
乏奇乏識者耳敬爲長句率無斃同作

秦郎百好俱第一烏丸如漆姿如石巧作松身與
鏡面借美於外非良質潘翁拜跼摩老眼一生再
見三歎息了知至鑒無遁形王家舊物秦家得君
今所有亦其亞伯仲小低猶子姪黃金白璧孰不
有古錦詩囊聊可敵睿思殿裏春夜半燈火闌殘
歌舞散自書細字答邊臣萬里風塵入長算初聞
橋山送弓劍寧知玉盃人間見夜光炎炎衝斗牛

會有太史占星變人生尤物不必有時一過目驚
老醜念子何忍遽磨研少待須臾圖不朽明窗靜
几風日暖有愁萬斛才八斗徑須脫帽管城公小
試玉堂揮翰手

孔武仲

賦張芸叟蕃刀

王師前年下靈州先生奉詔爲參謀軍書堆案不
足道欲斬名王懸髑髏官供器械如山積裝結雖
巧體質浮傳聞蕃刀最可用買置不惜千金酬沙

河洗湔血痕盡瑩若一水橫清秋長庚輝輝奪明
月光景迸溢不可收軍回倉卒未及試提挈萬里
來荒陬空齋倒掩閱圖史深林永日號猩鼯揮鳴
且欲驚暴客敢議與國平冤讐夜郎蒙恩放李白
炎嶺得旨還幽求輕船共泊長沙岸幾日對語清
湘樓紅蓮幕中邀客飲霧雨咫尺迷汀洲雜花落
盡無處覓官妓遣歸不敢留清歡未免假外物共
說鐵劍勝倡優君家所寶世稀有滿坐傳看驚殊
尤護之太過却銹澀頑蘚鬱結纏蒼蚪橫磨十萬

祇虛語得此已足馳燕幽今公又應元戎辟真能
寸截鯨鯢不郗生入幕宜有畫定遠出塞將封侯
我今喜得隨君去長江渺渺平天流路危或恐逢
水怪尾脊崔峯當吾舟煩公一效依飛勇爲公椎
鼓傾金甌

炭步港觀螢

九華之南蘆葦長流螢夕起不計雙爛如神仙珠
玉闕青羅掩映千明缸空江沉沉未見月近浦穿
林起還滅魚遊鳥宿自不驚我知此火初無情

孔平仲

月

夜如何其月在隅問行何爲乃躊躇海波壓輪不
得驅中庭有客心不樂欲挽玉兔鞭蟾蜍
夜如何其月正美起視萬物如明水山魃避人鬼
火死中庭有客立不移何暇眼力看箕尾
夜如何其月落愁光輝奄奄星益稠白雲擁漢波
橫流中庭有客望不極放志萬里誰能收

車班班

車班班入函關馬蕭蕭渡渭橋關下遊人不相識
橋邊美酒留行客海濶天高雲滿空風吹日暮還
南北

春暄太早率爾援筆

去歲有閏既苦寒今年春早亦太暄清明寒食在
二月禁火正如揮箒天桃花零落牡丹發漠漠江
頭吹柳綿細蟲打窗夜如雨潤氣蒸礎朝生泉卷
簾闌戶向風坐徹禱去屏思篔眠勸君用心慎倉
卒萬事轉易如車旋安知明日不凜冽莫以炎涼

隨目前

太平

長江卷波作沙色中有數頃如潑墨是爲望夫之
高山沉沉影落江心黑操篙下探不見底側行牽
挽難爲力疾風爲我西北來打鼓張帆何快哉百
夫呼噪絕水府心膽壯敵山崔嵬須臾已入大信
口回聽怒浪聲如雷姑孰堂前溪水清扁舟夜泊
已三更微微雨過有秋意漠漠雲開對月明

張舜民

縱步湘西

今朝不易得天晴閒過江西取意行忽從林外見
山色又向橋邊聞水聲綠竹長松間桃李天然翠
幙圍羅綺日暮歸舟醉不知晚風吹過湘江水

張耒

熠燿行

碧梧含風夜氣清林塘五月初飛螢翠屏玉簟起
涼意一點秋心從此生方塘水深涼雨集上下輝
輝亂疑碧幸因簾捲到華堂不畏人驚拂瑤席漢

宮千門連萬戶夜夜熒煌暗中度光流太液池上
波影落金盤月中露銀闕茫茫玉漏遲年年爲爾
足愁思長門怨妾不成寐團扇美人還賦詩避暑
風廊人語悄闌下撲來羅扇小已投幽室夜分明
更伴殘星天未曉君不見建昌宮殿洛陽西破瓦
頽垣今古悲荒榛腐草無人跡只有秋來熠燿飛

福昌秋日效張文昌

秋野無人秋日白禾黍登場風索索豆田黃時霜
已多桑蟲食葉留空柯小蝶翩翩晚花紫野鶉啄

粟驚人起洛陽西原君莫行秋光處處傷人情
黃桑蕭蕭秋水清田中日午村雞鳴塲邊九月禾
黍熟空原雉飛飽新穀棗籬蟲鳴村路曲道邊古
墳生野菊人稀田澗草茫茫洛陽秋深能斷腸

奉先寺

荒涼城南奉先寺後宮美人官葬此角樓相望高
起墳草間栢下多石人秩卑焚骨不作塚青石浮
屠當丘墳家家墳上作享亭朱門相向無人聲樹
頭土梟作人語月黑風悲鬼搖樹宮中養女作子

孫年年犢車來作主廢后陵園官道側家破無人
掃陵域官家歲給半千錢街頭買餅作寒食

女几祠下

山邊白雲閒不掃山下松花龍甲老東風古栢吹
暖香廟前土馬荒春草朝霞爲裳水爲珮守廟千
年老龍在清風掃堂神欲還山頭月出溪潺潺

讀蘇子瞻韓幹馬圖歌

我雖不見韓幹馬一讀公詩如見者韓生畫馬常
苦肥肉中藏骨以爲奇開元有臣善司牧四十萬

匹屯山谷養之罕用食之豐力不會施空長肉韓
生圖像無乃然我謂韓生巧未全君不見昔時騏
驥人未得餓守鹽車惟有骨昂藏不受塵土侵伯
樂未來空佇立騏驥乏食肉常臞韓生不寫瘦馬
駒誰能爲騏傳之圖不如凡馬飽青芻

再和馬圖

我年十五遊關西當時惟揀惡馬騎華州城西鐵
驥馬勇士十人不可羈牽來當庭立不定兩足人
立迎風嘶我心壯此寧復畏撫鞍躡轡乘以馳長

衢大呼人四走腰穩如植身如飛橋邊爭道挽不
止側身逼墮壕中泥縣空十丈才一擲我手失轡
猶攢蹄迴頭一躍已在岸但見滿道人嗟咨關中
平地草木短盡日散漫游忘歸驅馳寧復爲鞭策
進止自與人心齊爾來十年我南走此馬嗟嗟入
誰手楚鄉水國地卑污人盡乘船馬如狗我身未
老心已衰夢寐時時猶見之想圖思畫忽有感况
復慷慨吟公詩達人遇境貴不惑世有尤物常難
得寧能使我卽無情搔首長歌還歎息

大江春風浪如屋客舟迎風岡沙宿連檣接柁古
岸傍岸頭無人春草綠船頭日出炊烟起買魚攜
菜來就市漁人水惡不出門蕭條野市無雞豚堤
邊紙錢灰若雨澆酒賽神巫降語南人艇子不避
風橫江五兩翩翩去

郭圃送蕪菁感成長句

蕪菁至南皆變菘菘美在上根不食瑤簪玉筍不
可見使我每日思故國西鄰老翁知我意盈筐走

送如雪白蒸烹氣味元不改今晨一食如在北孔
明用蜀最艱窘百計捩拾無遺策當時此物助軍
行渭上裛中有遺植英雄臨事究瑣屑終服奇才
屈強敵想見躬耕自灌畦當時有意誰能測

九月十二日入南山憩一民舍冒雨炙衣

久之

石稜如刀不容步上挽垂藤下無路風寒雨滑徒
旅愁捨馬杖藜泥沒屨躋攀顛墜不容髮目眩心
寒驚反顧亦知垂堂有遺戒身仰微官欲誰愬蕭

蕭茅屋映絕壁門外澗澗清泉注解衣就火不能
暖旋拾山薪伐溪樹山翁生未食醯醢脫粟寒蔬
度朝暮人間平地固不少何用巉巖守磨兔秋聲
四起山靄夕壞屋疎籬睡無處披裘結束相見歸
過盡重雲下山去

秦觀

和王通叟琵琶夢

鶻鳩鳴時衆芳歇草堂夢斷音容絕風驚玉露不
成圓一夜芙蓉泣秋月金紋捍面紫檀槽曾把花

前送酒舸庾郎江令費珠璧小研紅牋揮兔毫風
流雲散令人瘦忍看麴塵昏錦綬楚水悠悠更不
西上天破鑑空依舊

題驤鬣圖

雙瞳夾鏡權協月尾鬣蕭森澤于髮鞍銜不施韁
復脫旁無馭者氣騰越地如砥平丘隴滅天寒日
暮抱饑渴驤首號鳴思一發超軼絕塵入恍惚東
門金鑄久銷歇曹霸丹青亦云沒賴有龍眠戲揮
筆眼前時見千里骨玉臺閭闔相因依嗟爾龍媒

空自奇鸞旗日行三十里焉用逐風追電爲
宿金山曹澗長青水三峽巖松盤石
山南山北江水流半空金碧隨雲浮我來乃值風
日好十月未寒如晚秋山僧引客尋蒼翠歷卷參
差到平地萬里風來拂骨清却憶人間如夢寐夜
深無風月入扉相對老人如稿枝流水與天爭入
海共笑此心誰得知下山却向中泠望翻憶當時
在屏障老母思兒且欲歸回首雲峯已天上
晁補之

行路難和鮮于大夫子駿

贈君珊瑚夜光之角枕玳瑁明月之雕牀一蘭秋
蟬之麗縠百和更生之寶香穠花紛紛白日暮紅
顏寂寞無留芳人生失意十八九君心美惡那得
量願君虛懷廣未照聽我一曲關山長不見班姬
與陳后寧聞衰去尚專房

贈戴嗣良歌時罷洪府監兵過廣陵爲東

坡公出所獲西夏刀劍公命作詩

三郎少日如乳虎代父搏賊驚山東硬弓長箭取

官職自說九戰皆先鋒將軍拳勇饋不繼痛惜靈
武奇計空城頭擲掄下俛走壯士志屈羞填胷平
生山西踏霜雪洪府下濕號兒童聞名未識二十
載初見長揖東坡公銳頭短後凜八尺氣似飲井
垂檐虹只令不語當陣立望見已是千夫雄往年
身奪五刀劍名王所擐犀札同晨朝攜來一府看
竊指私語驚庭中紅妝擁坐花照酒青萍拔鞘堂
生風螺旋鉞鏑波起脊白蛟雙挾三蒼龍試人一
縷立褫魄戲客三招森動容東坡喜爲出好礪洮

鴨綠石如堅銅收藏入匣人意定蛾眉稍進瑠璃
鍾太平君子尚小砒戒懼邾小毋莽蜂舞干兩階
庶可覩跳空七劍今何庸從公取礪歸作硯聞公
嘗諫求邊功

芳儀怨

金陵宮殿春霏微江南花發鷓鴣飛風流國主家
千口十五吹簫粉黛稀滿堂侍酒皆詞客拭汗爭
看平叔白後庭一曲時事新揮淚臨江悲去國令
公獻籍朝未央敕書築第優降王魏俘曾不輸織

室供奉一官奔武疆秦淮潮水鍾山樹塞北江南
易懷土雙燕清秋夢栢梁吹落天涯猶並羽相隨
未是斷腸悲黃河應有却還時寧知翻手明朝事
咫尺人生不可期蒼黃三鼓滹沱岸良人白馬今
誰見國亾家破一身存薄命如雲信流轉芳儀加
我名字新教歌遣舞不由人採珠拾翠衣裳好深
紅退盡驚胡塵陰山射虎邊風急嘈雜琵琶酒闌
泣無言徧數天河星只有南箕近鄉邑當時千指
渡江來同苦不知身獨哀中原骨肉又零落寄語

黃鵠何當回生男自有四方志女子那知出門事
君不見李君椎髻泣窮年丈夫飄泊猶堪憐

飲城西贈金鄉宰韓宗恕

大夫盤中定州棗三舉檐花舞凌亂請君行盞且
莫稽爲君起賦飲城西城西古道如澗深東風吹
沙不見林虛堂更覺原野濶榆柳浩浩波濤侵雜
花一園來遠道兩株江南梅更好櫻桃已晚猶爛
漫百枝如雪聊可繞常時東風無此寒常時諸君
無此閒且看餅口似魚貫莫惜面紋如纈斑大夫

工爲宋玉賦思不能涯字無數秀才酷似東野貧
白屋青山愁曲身籍咸不宥羞北阮主簿高材卽
仇覽成詩午景已妍和罷酒花開應更多山翁歸
不醉當奈峴山何

晁冲之

古樂府

大星何歷歷小星爛如石掖垣崔嵬橫紫微十二
羽林森北極今夕何夕月欲沒虎抱空關龍厭直
崢嶸北斗著地垂手去瓠瓜不盈尺嚴陵醉臥光

武傍浮查正值天孫織王良挾策飛上天傳說空
騎箕尾立君不見茂陵棄子欲登仙自將壯士終
南邊忽然遭窘出璽綬歸來下詔除民田阿瞞急
示乘輿物鮮卑仍棄珊瑚鞭又不見古來垂堂戒
華屋敵國挾輶戎接轂白龍魚服誤網羅孔雀金
花被牛觸

夷門行贈秦夷仲

君不見夷門客有侯嬴風殺人白晝紅塵中京兆
知名不敢捕倚天長劍著崆峒同時結交三四公

聯翩走馬幾馬驄仰天一笑萬事空入門賓客不
復通起家簪笏明光宮嗚呼男兒名重泰山身如
葉手犯龍鱗心莫懾一生好色馬相如慷慨直辭
猶諫獵

華嚴寺贈僧法一墨

黃山之巔百尺松虬枝偃蓋連羣峯山神守護魑
魅避道人剪伐天爲容捫崖蹠蹠篝火遠絕壁掩
靄凝烟濃玄霜霏霏玉杵下捕麋煮角當嚴冬陰
房風日不可到律琯吹盡灰無蹤小書細字著名

姓黃金照耀團雙龍守臣再拜選進日九關有詔
開重重老儒偶得實天幸千金更買無由逢上人
淡泊何所好工書草隸如飛蓬苦來求我惜不得
一酬十載相過從君不見玉堂詞人紫垣客拜賜
舞蹈黃羅封長安紙價猶未遍江南江北山皆童
復以承晏墨贈之

我聞江南墨官有諸奚老超尚不如廷珪後來承
晏復秀出喧然父子名相齊百年相傳文斷碎彷彿
尚見蛟龍背電光屬天星斗昏雨痕倒海風雲

晦却憶當年清暑殿黃門侍立才人見銀鈎灑落
桃花牋牙牀磨試紅絲研同時書畫三萬軸大徐
小篆徐熙竹御題四絕海內傳祕府毫芒惜如玉
君不見建隆天子開國初曹公受詔行掃除王侯
舊物人今得更寫西天貝葉書

米芾

真孃墓歌

何不學仙豕纍纍白楊西郭陰風悲虎丘一叩真
孃墓薜荔援牆蘭委露千歲蒙茸幾樹花夜飄鬼

火曉啼鴉尚憐挾瑟彈清月猶憶吹簫乘彩霞吳
閬少年往來道黛蛾釵燕誰能好酒滴春雲夢不
消泉聲幽咽鐘聲老陌上行遊緩緩歸昨日紅顏
今日非東望闔閭穿葬處玉鳧欲化湛盧飛

郭祥正

蓮根有長絲

蓮根有長絲不供貧女機柳梢有飛絮不煖寒者
衣朝歌悠悠暮歌短下地沉沉上天遠東生白日
還西沉志士常懷萬古心

金山行

金山杳在滄溟中
雪崖水柱浮仙宮
乾坤扶持自今古
日月髣髴躔西東
我泛靈槎出塵世
搜索異境窺神工
一朝登臨重太息
四時想像何其雄
卷簾夜閣挂北斗
大鯨駕浪吹長空
舟摧岸斷豈足數
往往霹靂鎚蛟龍
寒蟾八月蕩瑤海
秋光上下磨青銅
鳥飛不盡暮天碧
漁歌忽斷蘆花風
蓬萊久聞未成往
壯觀絕致遙應同
潮生潮落夜還曉
物與數會誰能窮
百年形影浪自苦
便欲此地安

微躬白雲南來入我望
又起歸興隨征鴻

李 廌

驪山歌

君門如天深九重
君王如帝坐法宮
人生難處是安穩
何爲來此驪山中
複道連雲接金闕
樓觀隱烟橫
翠紅林深谷暗迷
八駿朝東暮西勞
六龍六龍西幸峩
眉棧非風便入華清院
霓裳蕭散羽衣空
麋鹿來遊墟市變
我上朝元春半老
滿地落花人不掃
羯鼓樓高挂夕陽
長生殿古生青草
可憐

吳楚兩醯雞築臺未就已堪悲長楊五柞漢幸免
江都樓成隋自迷由來流連多喪德宴安鳩毒因
奢惑三風十愆古所戒不必驪山可亾國

賀鑄

江南曲

遊倡奉杜若別浦鴛鴦落向晚鯉魚風客檣千里
泊當時桃葉是新聲千載長餘隔水情烏衣巷裏
人誰在白鷺洲邊草自生

叢臺歌

累土三百尺流光二千年人生物數不相待摧頽
故址秋風前武靈舊隴今何在禿樹無陰困樵采
玉簫金鏡未銷沈幾見耕夫到城賣君不聞叢臺
全盛時綺羅成市遊春暉一從瑁輦閉荒草蕭散
行雲無復歸招魂想像風流在晴華露蔓猶依稀
縈紆棘逕撩人衣禾黍晚來貍貉肥層簷碧瓦碎
平地夢作鴛鴦逐伴飛

千里劉子弁
去平人人日

去年人日螺江邊今年人日在通川家園浩蕩五
千里客子騷屑心茫然霜蘆盡解故時葉生意陡
爾歸蘭荃海風如刀水塞渡欲航野水雪暗天他
鄉信美非吾土香草悅魂真浪傳章貢直西三徑
在何時歸釣潭頭楓葉編

全盛楊

時

遊武夷

函關崎嶇走秦鹿天下並逐爭羣雄抉雲翻空鼇
足折黔黎竄踴如寒蛩武夷山深水清泚避世猶

有高人蹤龍泓東注海波涵玉女翠擁秋雲鬆赤
霄真骨寫虛壁通泉凡筆慙非工藏舟浮梁跨絕
壑隱見似與天潢通當時雞犬不復見窠巖依舊
烟霞籠我來秋杪月旣望尚有幽菊埋榛叢天容
洗淨雨新霽雲幕四卷清無風掀篷進櫂窮異境
注目想見流殘虹回船杖屨躡幽勝松竹窈窕環
琳宮自憐病骨挂塵網幔亭高會何由逢解衣歸
臥玉瑣碎仰看明月穿疎篷

臥玉瑣碎仰看明月穿疎篷

上平天水蠅中

洞庭水落洲渚出疊翠疏峯遠烟沒重樓百尺壓
高城簷瓦參差倚天闕湖光上下天水融中以日
月分西東氣凌雲夢吞八九欲與溟渤爭雌雄澄
瀾無風雨新霽一日萬頃磨青銅瑠璃夜影貯星
漢騎鯨已在銀河中湘妃帝子昔何許但有林壑
青浮空蒼梧雲深不可見遺恨千古嗟何窮須臾
晦冥忽異色風怒濤翻際天黑乘陵瀨壑走魑魅
渟滘百怪誰能測忽看舟子玩行險更欲飛帆借
風力安得晴雲萬里開依舊寒光浸虛碧

寄范正甫

羈窮莫厭如牢圈從古功名出屠販男兒不負縣
弧心馬革裹尸猶所願君不見淮陰寄食饑貧久
胯下英風亦何有逢時吐氣雷電奔金印纍纍大
如斗玉門晝夜羽檄驚睥睨欲塹天都城叩關虎
士鬱餘怒科頭奮戟如鵬鷹君從壯年蘊奇策未
宜縮手藏柴荆昔人投筆真豪傑慨然萬里終成
名南山白額真欲老百獸遭之猶裂腦

謝逸

送董元達

讀書不作儒生酸
躍馬西入金城關
塞垣苦寒風氣惡
歸來面皴鬚眉斑
先皇召見延和殿
議論慷慨天開顏
謗書盈篋不復辯
脫身來看江南山
長江滾滾蛟龍怒
扁舟此去何當還
大梁城裏定相見
玉川破屋應數間

周紫芝

莫愁歌

蓮花深紅蓮葉綠
平沙月上鴛鴦宿
青腰三板蘭作橈
月下莫愁歌一曲
移舟入花花轉深
花深調苦難爲音
江邊半夜誰相語
只有嬋娟知此心
露花漸白月漸午
刺舟自覓來時路
明朝繫纜柳邊門
却在夜深潮落處

韓駒

城上怨

雨似懸河風似箭
風號雨馳寒刮面
何處巡城老健兒
城上謳歌自哀怨
不知底事偏苦傷
聲高聲低哀思長
戍邊役重畏酷法
去國年多思故鄉
城

上歌時方夜半最是孤齋醉魂斷和風和雨兩三
聲推枕投衾坐長歎傳聞黠鹵動熙河戰士連年
不解戈今夜風號雨馳處城上哀吟知幾何

題蕃騎圖

塞上漠漠黃雲秋黃鬚胡兒騎紫騮一馬攙前弄
風走胡兒掣轡空驤首迴鞭慎莫向南馳漢家將
軍方打圍奪弓射汝猶可脫奪汝善馬何由歸

送里人陳會往見江西漕使

勸君少留持一觴與君鄉里皆陵陽兒童共戲苦

鹽岸老大相逢烏石岡拾遺平生丈人行拊我謂
我能文章豈知今無一絲長但餘顛華面顏蒼君
行往見玉節郎感時憂國歌慨慷餉師十萬西平
羌笑我挾復山中藏

題畫太一真人

太一真人蓮葉舟脫巾露髮寒颼颼輕風爲帆浪
爲楫臥看玉宇浮中流中流蕩漾翠綃舞穩如龍
驤萬斛舉不是峯頭十丈花世間那有葉如許龍
眠畫手老入神尺素幻出真人恍然坐我水天

府蒼烟萬頃波粼粼玉堂學士今劉向禁直峩
九天上不須對此縈心神會植青藜夜相訪
謝錢珣仲惠高麗墨
王卿贈我三韓紙白若截肪光照几錢侯繼贈朝
鮮墨黑如點漆光浮木舊傳績溪多老松奚超旣
死松亦空易水良工近名世珍材始不歸潘翁蕭
然南堂一居士赤管踰麋無月賜借問玄圭何自
來去年海中持節使明窗宴坐不憇憇引紙磨墨
寒生風自笑平生縮蛇蚓更慚爾雅注魚蟲殷勤
二物從來遠禪海環瀛眼中見若欲揮寫藏名山
不如却作談天衍

送葛亞卿欲行不一過僕

吾廬偪仄門三尺慚愧春風巧相覓叩關惟許葛
主孫有時藉草傾餘瀝汝不如南池主人車載客
紅旗阜蓋行遠陌又不如東郭公子柳藏門青娥
綠髮坐開樽是身牢落終何爲人不汝嫌汝自嗤
伸眉一笑能幾時忽聞春盡王孫歸春風欲盡猶
有情飄英墮絮俱傷神王孫未歸迹已掃秣馬膏

車何太早明日一盃愁送春後日一盃愁送君君
應萬里隨風去若到桃源記歸路

唐庚

劍州道中見桃李盛開而梅花猶有存者
桃花能紅李能白春深何處無顏色不應尚有數
枝梅自是東君苦留客向來開處當嚴冬桃李未
在交遊中卽今已是丈人行肯與年少爭春風

採藤曲效王建體

魯人酒薄邯鄲圍西河渡橋南越悲歲調紅藤百

萬計此貢一作無窮時去年採藤藤已乏今年採
藤藤轉竭入山十日脫身歸新藤出土拳如蕨淇
園取竹况有年越山採藤輸不前今年輸藤指黃
犢明年輸藤波及屋吾皇養民如養兒鑿空爲此
謀者誰

崔鵬

早春偶題

寒風浙瀝鳴枯葦小鴨睡殘猶未起更教細雨結
輕寒坐聽蕭蕭打窗紙石盆養蒲已抽翠瑯斛栽

花先弄紫擁爐閉閣賦幽香未怕春水生硯水

分宜道中

老牯挽犁泥沒膝剡剡青秧鉞水出大麥登場小
麥黃桑柘葉大蠶滿筐猿鳥初呼聚儔侶繅絲百
箔聞好語此時物色不可孤勸君沽酒提壺蘆

卷画溪行

蝶趁花飛爭入坐倚空百尺遊絲墮亂山銜日半
船明斷雲載雨前村過蕨芽戴土小兒拳魚市人

歸柳貫鮮罨画溪頭人語好烹魚煮蕨餉春田

崇仁縣

萬山攢擁天一笠北風吹雨兩鬢濕饑鳥絕叫護
巢飛老蛟怒起拏雲立孤城短日礎杵急騎驢渺
渺衝泥入道傍廢井無人汲遺民到今傳舊邑故
物漂流百戰餘客子起坐萬感集小驛香醪如雪
汁一盃快作長虹吸酒醒寂歷照短檠幽咽數聲
鄰婦泣

周必大 一首

范成大 十三首

陸游 十九首

楊萬里 七首

積書巖宋詩刪卷十

錫山顧貞觀梁汾選

武陵胡獻徵存人閱

七言古詩四

李綱

食橘

洞庭一夜天雨霜橘林綠苞朝已黃遠題書後三百顆入手便覺秋風香黃金爲膚白玉瓠沆漉深貯甘且芳雕盤初擘喫清露水齒乍嚼流瓊漿色

七古四
香氣味紛可喜下視衆果皆茫茫嗟余平生愛種
此木奴千樹梁谿傍只今蒿艾已埋沒豈敢向日
爭熒煌蓬萊雲氣久寂寞漢殿無復羅瀟湘厥包
縱有盡酸澁剖之蠹朽安足嘗乃知汝病是天意
坐使玉食無輝光荒山乃爾飫佳品安得騷裏置
錦堂君不見杜陵野老歌病橘蕭蕭半死誠可傷

題邵平種瓜圖

君不見伯成子高讓侯爵在野終年自耕穫下風
趨問禮徒勤佶佶田間事蕪落又不見於陵仲子

推相位爲人灌園刈葵藿抱甕區區同漢陰不糝
藜羹有餘樂古來賢達有如此志趣未可常情度
力辭富貴居貧賤凜若霜風隕輕籜召平本自侯
東陵秦破國除休一壑當時漢祖疑鄼侯置衛墉
封意非薄衆賓皆賀平獨弔一言轉禍推先覺以
茲智畧佐風雲復取故封何所作歸來種瓜青門
外灌溉鋤耘甘寂寞長安之東壤尤美翠蔓離離
照城郭秋陽正熾瓜正肥解衣摘實如俛鶴兒童
玉立形骨清挈笠携筐助操作遂令世美東陵瓜

七古四
二

身後高名動寥廓屠販曾聞封絳灌奴僕後來興
衛霍高鳥已盡良弓藏更有韓彭辱囚縛何如終
老守瓜哇自飽飽他真不惡龍眠也是可憐人畫
此端令事如昨世間如畫畫如夢聊爲作歌資一
噓

宗澤

後發憤行

翁擁麾幢我爲兒剽聞竊睹皆兵機其中襲擊不
容瞬颺行電掣猶逶迤邊馬長驅越大河天下震

驚宮闕危肉食之謀殊未臧我憤切骨其誰知慨
然奏疏金馬門力陳盟賂損國威嚴尤下策尤可
笑晁錯上書亦奚爲道路荆棘初剪除花如步障
吾東之八年閉戶尺蠖屈一旦渡關匹馬馳行行
側身聽戎捷忽聞募士詔遣歸濃書大墨榜教詔
曰敵悔過今退師羽檄向來召貔虎乃詠出車歌
杖杜橐兵鞘刃兵猶怒却把鋤犁農鼓舞君王神
武今藝祖爾賊不歸汗我斧

遊獨樂園

范公之樂後天下維師温公乃獨樂二老致意出處間殊塗同歸兩不惡鄙夫杖藜訪公隱步無石砌登無閣堂卑不受有美奪地僻寧遭景華拓始知前輩稽古力晏子蕭何非妄作細讀隸碑增慷慨端正似之宜再拜種藥作畦醫國手澆花成林膏澤大見山臺上飛塵多高山仰止如公在

程俱

有美一人

三首時鄒志完在昭州曾子開在汀州陳瑩中在合浦

有美一人在昭平藕絲爲衣蘭作裙君初顧言淑

且貞直欲載以黃金輪人心變化如浮雲明妝覺暗笑作顰何當還之承華茵令君宴寢凝清芬有美一人在烟汀朱顏朝滌玉壺冰素手暮理朱絲繩語言窈窕丹鳳鳴坐持紈扇睇秋螢何當還之翡翠屏爲君把鏡整衿纓有美一人在南浦月明採珠光照渚瑤衣被體金索縷獨抱幽寒沫烟雨何當置之白玉宇爲君陽春歌激楚

夜半聞橫管

秋風夜攬浮雲起幽夢歸來度寒水一聲橫玉靜
穿雲響振疎林葉空委曲終時引斷腸聲中有千
秋萬古情金谷草生無限思樓邊斜月爲誰明

戲呈虞君明察院

三仕三已心如空一壑一丘吾固窮門施雀羅正
可樂車如雞栖良不惡胷中九華初欲成綵衣玉
斧雙鬟青世間何樂復過此不失清都左右卿
送趙子晝奉議歸睢陽用熊倅韻
紛華眩人劇朱碧子獨好書如好色王孫被服甚

寒士射策君門先破的榮州書窟三萬卷錦囊付
此龐睂客南遊句吳北大魏亦復徒勞問刀筆不
唯昏齒腐經史正自雲山鑠胸臆老來息交思簡
事爲子忘劬廢晨昔春風滿帆送歸舸回首清游
如昨日知君名駿定千里不待朝廷訪幽側有書
時寄雁南飛顧我漁樵正爭席

汪藻

桃源行

祖龍門外神傳璧方士猶言仙可得東行欲與羨

門親咫尺蓬萊滄海隔那知平地有青春只屬尋
常避世人洞中日月空千古花下山川長一身中
原別後無消息聞說胡塵因感昔誰教晉鼎判東
西却媿秦城限南北人間萬事愈可憐此地當時
亦偶然何事區區漢天子種桃辛苦望長年

讀楊子雲傳

老不曉事楊子雲綴文譏訶堅逐貧班生曲筆甚
假借謂不戚戚元非真草玄欲作後人計投閣自
迷身不利王涯筮中好其書寧復逆知甘露事蠅

聲紫色欺昏童義士遠引如冥鴻胡爲顛眩尙執
戟美新屈首稱臣雄岷山沃野蹲鴟大拓落不歸
良已過近危竟似井眉瓶虛作反騷嗤楚些詭情
懷祿遭嘲評但用筆墨垂聲名文章要亦千古事
久矣法言今正行

葉夢得

山間每歲正月望後夜梅花正開多與客
飲花下今年郡廨獨坐十四夜張暘叔
晁激仲相過共話宣和間事慨然歸不

能寐因以寫懷

山頭野梅白玉花月明弄影紛橫斜青天無雲萬
峯立下有三畝幽人家年年春歸不暇省但掃雪
逕尋寒葩老夫已忘少年事燈火豈念更繁華一
杯起步徧空谷破屋歸臥暎朝霞陪都復來亦何
有凜凜殺氣浮高牙重關深鎖夜漏永忽記昨夢
翻長嗟景龍門前一月會金盃賜酒余雄誇神州
陸沉近歸我漢節方議通流沙天翻地覆那得料
忍復更聽漁陽搗

虎丘

虎丘之名歲二千虎丘之丘何渺然衆山爭高隱
日月笑此拳石埋平田雖然培塿疑異物劃開陰
崖十丈懸冢中有恨索遺指亭上無語傳枯禪偏
是吳人愛山急逐面分方誇凭立屋承隋唐良穩
稱墨題熙豐尙新濕松梢莫遣風雨橫石盤自添
苔蘚澁春來春去吳人游足蠶層巔踣應泣

陳與義

送王因叔赴試

楓落南紀明秋高洞庭白自是天涯人更送湖上
客人生險易乘除裏富貴功名從此起不須惜別
作酸然滿路新詩付吾子

謝主人

春禽勸我歸主人留我住一笑謝主人我自無歸
處擬借溪邊三畝春結茅依樹不依鄰伐薪正可
煩名士分米何須待故人

遙碧軒作呈使君少隱時欲赴召

我本山中人尺一喚起趨塵埃君爲邊城守作意

邀山人窓牖朝來爽氣如有期送我憑軒一杯酒
丈夫已忍猿鶴羞欲去且復斯須留西峯木脫亂
鬢擁東嶺烟破修眉浮主人愛客山更好醉裏一
笑驚蠻州丁寧雲雨莫作厄明日青山當逐客

李彌遜

虞仲通判以溪聲名軒約同賦

山根出泉瀉鳴玉上有蒼崖擎佛屋無風水石自
撞觸不盡潮音發寒谷宰官豈是雲間陸舊識南
泉生處熟當軒大榜與名目平地重翻偃溪曲曲

中時轉三妙語一一聲音談佛祖喧豗噫視十方
鼓萬壑風雷送烟雨此聲不屬聞中取六鑿相攘
竟誰主後來紛紛何足數五乳峯頭曾賺舉山翁
有耳百不聞團蒲曲几窮朝昏何時沿溪掬寒綠
掃葉煎茶睡初足

劉子翬

四不忍之二

草邊飛騎如烟滅拉獸摧斑飲其血此時疾首念
鑿輿玉體能勝飢渴無危城屑麴驚雲擾簞簞無

光天座杳奮戈儻未雪深讐我食雖甘何忍飽
黃河鑿鑿冰成路人語寒空氣爲霧此時泣血念
鑿輿玉體能勝凜冽無蒼皇天步蒙塵去龍袞飄
零傷歲暮飛書儻未伐姦謀我服雖華何忍御

贈宗周賓

我車南君車北相逢總是天涯客擁鑪談笑一燈
殘出門風雨千山隔

兼道攜古墨來墨面龍紋墨背識云保泰
九年奉勅造長春殿供御龍印香煤旁

又識云墨務官臣庭邽監官臣夷中臣
子和臣卞等進蓋江南李氏物也感之
爲作此詩

長春殿古生荆薈猶有前朝遺物在錦囊珍重出
玄圭雙虬刻作蜿蜒態枯皮剝裂弄幾刃斷玦精
堅磨不殺吾聞李氏據江左文采風流高一代當
時好玩不獨此器用徃徃窮奢汰徵工選技填御
府不惜千金爲賞賚治兵唐推英衛精治民漢許
龔黃最惜哉取士不知術妙手獨得庭邽輩真主

驅馳八極中荒王逸樂孤城內汗青得失更誰論
尤物競爲人寶愛嗟余視此真糞土事有至微猶
足戒投文欲徃弔江流幽魂未泯應慚悔

朱松

飲梅花下贈客

憶挽梅花與君別終年夢掛南臺月天涯谿上一
尊酒依舊風枝舞香雪高情絕豔兩無言玉笛水
灘自幽咽且當醉倒此花前猶勝相思寄愁絕

胡宏

同伯氏還鄉

江村沙暖萋蒿長
味比枸杞餘甘香
茁茁荻芽生近渚
紫花臺菜初未嘗
白羊烏豨俱在牧
茅舍竹籬真故鄉
人生未必須富貴
萬事且願身康強
徑買官場舊醅酒
共醉春風殊未央

王庭珪

題宣和御畫

玉鎖宮扉三十六
誰識連昌滿宮竹
內苑寒梅欲放春
龍池水暖鴛鴦浴
宣和殿後新雨晴
兩鵲飛

來東向鳴當時妙手
貌不成君王筆下春
風生長安老人眼
曾見萬歲山頭翠
華轉恨臣不及宣政
初痛哭天涯觀畫圖

題惠崇畫秋江鳧雁

老崇學畫如學禪
中年悟入理或然
長江未落鳧雁下
舒卷忽若無丹鉛
定是維摩三昧裏
半幅生綃開萬里
不用并州快剪刀
斷取鐵圍山下水

觀駱元直進江南形勢圖

異時漢網疎天討
射雕馬鬣江南草
石頭重戍豈

無兵將軍未識丹陽道至今戰骨堆秋霜傷心不
忍問耆老龍蟠虎踞昔何雄赤壁濡須在眼中潯
陽江水射蛟處旌旗拂天來向東艨艟塞川不敢
下昔人曾此破曹公橫流九道波翻屋試請輕兵
渡淮曲夜入長安人不知應見畫圖心已熟他日
將軍按此圖鼓行而西如破竹

題徐明叔畫湘西磨崖圖

崖在湘西白鶴
峯紀官軍破賊

衡山高出北斗邊九疑蒼梧相屬聯羣峰環走如
却立山脚插入瀟湘川朱陵渺邈迷處所白鶴噴

薄飛流泉坐看徐郎拂絹素盡驅山岳置眼前徐
郎豈是真畫手酒酣遊戲乃其天巴陵洞庭連浦
淑鯨鯢蟠穴爲賊淵詔謂將軍出旗鼓樓船蹴踏
驚浪喧攙槍夜落照湖水琯弓十萬猶控弦湘西
古寺最奇絕丹崖翠壁開何年况公文章善叙事
大字怪偉宜鑱鐫中書異時觀落筆因煩吮墨圖
凌烟孟公韓公毛髮動腰鞞大羽冠進賢他年中
興事可考公名亦與茲山傳

黃公度

惜別行送林梅卿大鶴赴闕

刺桐城邊桐葉飛刺桐城外行人稀客來別我有
所適問客此去何當歸林卿妙齡才秀發胸中萬
卷涵溟渤家聲合杳蓋九州里第嶙峋表雙闕揭
來試吏天南方驥繫焉能騁所長梅仙脫身東市
卒杜老把筆中書堂傳道淮壩減豺虎政須禮樂
事明主之子軒軒霄漢姿好向春風刷毛羽

陳淵

鄧志宏送張思道遊福唐次韻

紛紛宛耳俱宜洗坐遣高人厭丘里迅流蚤自促
行舟更有西風滿江葦當年筆陣掃千人今日流
輩推能文英辭雄辯灑醉墨倏忽百變春空雲人
間萬事秋毫細軒冕儻來誰著意身隨去櫂落波
間興逐冥鴻渺天際

范浚

四月十六日同弟姪效李長吉體分韻得

首字

黃梅雨歇春歸後搏黍哺雛鳩喚婦紅殘小頰溪

上花翠刷濃眉陌頭柳籜痕半脫烟篁瘦露裏幽
香沁書牖雲容漠漠曉陰愁麥信風前一搔首

理喻

郵亭羈客寒無氈夜懷家山情惘然燈前坐感雨
蕭瑟浩歎達曉愁無眠鄰翁不出蓬茨裏聽雨聽
風心似水黃昏鼻息已雷鳴往往簷喧不經耳愁
霖一種聲紛紛鄰翁不聞羈客聞是中轉物有妙
理起予暗契漆園旨

周必大

進讀三朝寶訓終篇賜宴賜賚謝恩詩

藝祖提劍開八荒太宗混一垂衣裳眞皇破敵神
武揚華夏救寧法度彰寶訓成書紀宏綱有典有
則萬葉昌憶昔壬午神龍翔季秋庚子辰集房肇
開講席臨清廂赭袍玉斧光照廊台司夾侍書案
黃翰林進讀天容莊微臣簪筆近御牀親聞玉音
義甚長君子小人初何常非關時運弱與強祗繫

人主所否臧當年記注此特詳

紹興壬午九月庚子初開經筵聖語

載起居注中

往來寒暑今一章牙篋謬執心徬徨終篇

正直恩德洋道山肆筵酌天漿宮花壓帽羅絲簧
硯來復古翰墨光臣所得端硯刻
復古殿三字馬出帝閑真驪
驪闔山正焙值寶香君賜如天不可量歸美獨愧
詞荒唐恭惟聖治超百王夙夜基命不敢康文德
既修夷可攘俎豆永掃旄頭芒三聖勲烈同焯煌
萬年億載娛慈皇

范成大

古風酬胡元之

拂我膝上琴當客清風襟我琴無軫絃不和願借

之子調其音美人一笑千黃金彈向江頭花木深
下有同隊之遊魚上有同聲之鳴禽琴心一壘一
歎息江花江草無終極

縑絲行

小麥青青大麥黃原頭日出天色涼姑婦相呼有
忙事舍後煮繭門前香縑車嘈嘈似風雨繭厚絲
長無斷縷今年那暇織絹著明日西門賣絲去

田家留客行

行人莫笑田家小門戶雖低堪灑掃大兒繫驢桑

樹邊小兒拂席軟勝種木日新春雪花白急炊香
飯來看客好人入門百事宜今年不憂蠶麥遲

嶺上紅梅

霧雨懸脂照松竹江南春風一枝足滿城桃李各
嫣然寂寞傾城在空谷城中誰解惜娉婷遊子路
傍空復情花不能言客無語日暮清愁相對生

送詹道子教授奉祠養

新安學官天下稀先生孝友真吾師斑衣誤作長
裾曳二年思歸今得歸牋詞上訴人叵挽璽書賜

可羣公歎青山百匝不留人空爲諸生遮望眼白
雲孤起越南天向來恨身無羽翰下馬入門懷橘
拜身今却在白雲邊鶴髮鬢鬢堂上坐兒孫稱觴
婦供果世間此樂幾人同看我風前孤淚墮一盃
送舟下水西我欲贈言無好詞徑須喚起東廣微
爲伊重補南陔詩

湘口夜泊南去零陵十里矣營水來自營

道過零陵下湘水自桂林之海陽至此

與營會合爲一江

我從清湘發源來直送湘流入營水故人亭前合
江處暮夜檣竿矗沙尾卻從湘口望湘南城郭山
川恍難紀萬壑千巖詩不徧惟有蒼苔痕屐齒三
年瘴霧亦奇絕浮世登臨如此幾湖南山色夾江
來無復瑤簪插天起陂陀狠石蹲清漲淡蕩光風
浮白芷騷人魂散若爲招傷心極目春千里我亦
江南轉蓬客白鳥愁烟思故壘遠遊雖好不如歸
一聲鷓鴣花如洗

重遊南嶽

捨舟得馬如馭氣直入青松三十里我從蠻嶺瘴
烟來不怕雨雲埋嶺趾憶昔南征欵廟庭往來無
恙神所社當時已有歸田願帝臨此心如白水煌
煌南正館于東手握八觚溫玉璽駿奔濤霍左右
輔好生不殺扶炎紀崇禋竣事曉壇空躋攀小試
青鞵底不知雲磴幾千丈但見漫山白虎尾石頭
招我上南臺瑞應闌干天半倚福巖鐘磬過橋來
髣髴三生如夢裏堂中尊者已先去苔鎖巖扉何
日啓竹嫌磽确老愈瘦松畏高寒蟠不起癯儒尙

病怕深登幽討未窮行且止我評七十二高峰鬱
律穹隆少觀美儼然可瞻不可玩徃徃雄尊如負
宸乃知嶽鎮蓋深厚不與他山爭秀偉區區獻狀
眩兒童乳洞瀑巖真戲耳

離堆行

殘山狠石雙虎臥斧蹟鱗皴中鑿破潭淵油油不
敢唾下有猛虎踰鐵鎖自從分流注石門西州秔
稻如黃雲封羊五萬大作社春秋伐鼓蒼烟根我
昔官稱勸農使年年來激西江水成都火米不論

錢絲管相隨看蠶市欵門得得酌清尊椒漿桂酒
刪羶葷妄欲一語神豈聞更願愛羊如愛人

巫山高

余舊嘗題陳季陵巫山圖考宋玉賦意辯高唐
之事甚詳今過陽臺之下復作樂府一首世傳
瑤姬爲西王母女嘗佐禹治水廟中石刻在焉
濕雲不收烟雨霏峽船傍灘梢廟磯杜鵑無聲猿
叫斷惟有飢鴉迎客飛西真功高佐禹跡斧鑿鱗
皴倚天壁上有瑤簪十二尖下有黃湍三百尺蔓

花蚪木風烟昏蘚珮翠帷香火溫霧游飄忽定何
許時有行人開廟門楚客詞章元是諷紛紛餘子
空嘲弄玉色頰顏不可干人間錯說高唐夢

萬景樓山谷來遊時未有此樓也

左披九頂雲右送大峨月殘山剩水不知數
當樓供勝絕玻瓈濯錦遙相通指麾大渡來朝宗
川霧胥命各東去我亦順流呼短篷詩無傑語慙
風物賴有丹青傳小筆仍添詩客倚欄看令與山
川相映發龍彎歸路遶烏尤棟雲簾雨邀人留若

爲喚得涪翁起題作西南第一樓

癸亥日泊舟吳會亭

去年春盤浙江驛湛湛清波動浮石今年春盤吳
會亭冥冥細雨濕高城天邊作客風沙裏今年去
年成老矣亭心古井冷無波過眼人情亦如水憶
昔三生住翠微偶來平地著征衣山中故人應大
笑扁舟坐隱何當歸

鎮東行送湯丞帥紹興

吳波鱗鱗越山紫鎮東旌旆東風裏前驅傳道相

君來一夜鑑湖春漲起鑑湖如鑑涵空明相君出
處如湖清十年勲業泰山重五鼎富貴浮雲輕人
言公如裴相國綠野堂高貯風月我獨願公如子
牟身在江湖心魏闕浯溪有石高嵯峨公方東征
如此何丁寧湖水莫斷渡早晚歸來絕江去

倪文舉奉常將歸東林出示綺川西溪三

賦輒賦長句爲謝

綺川亭上凌雲賦人在回仙舊遊處誰教書劍走
長安荻月楓霜等閑度朱門不灸釣竿手萬卷難

供折腰具偶然把筇憶蓴羹乞得閑官徑呼渡江
漲橋頭有渡船船頭歷歷東林路雲烟如畫水如
天笑憶紅塵問良楛我亦吳松一釣舟鱗舍漂搖
幾風雨因君賦裏說江湖破帽蹇驢明亦去雞犬
相聞望可見鷗鷺同盟心已許相過得得欵溪門
雪夜前村聽鳴櫓

陸游

古別離

孤城窮巷秋寂寂美人停梭夜歎息空園露濕荆

棘枝荒蹊月照狐狸迹憶君去時兒在腹走如黃
犢爺未識紫姑吉語久無據况憑瓦兆占歸日嫁
來不省出門前魂夢何因識酒泉粉綿磨鏡不忍
照女子盛時無十年

山南行

我行山南已三日如繩大路東西出平川沃野望
不盡麥隴青青桑鬱鬱地近函秦氣俗豪鞦韆蹴
踰分朋曹苜蓿連雲馬蹄健楊柳夾道車聲高古
來歷歷興亾處舉目山川尙如故將軍壇上冷雲
低丞相祠前春日暮國家四紀失中原師出江淮
未易吞會看金鼓從天下却用關中作本根

題少陵畫圖像

長安落葉紛可掃九陌北風吹馬倒杜公四十不
成名袖裏空餘三賦草車聲馬聲喧客枕三百青
銅市樓飲杯殘肉冷正悲辛仗內鬪雞催賜錦

喜小兒輩到行在

阿綱學書蚓滿幅阿繪學語鸞轉木截竹作馬走
不休小車駕羊聲陸續書窓浣壁誰忍嗔啼號也

復可憐人却思胡馬飲江水敢道春風無戰塵傳
聞賊棄兩京走列城爭爲朝廷守從今父子見太
平花前飲水勿飲酒

得韓无咎書寄使金時宴東都驛中所作

小闋

大梁二月杏花開錦衣公子乘傳來桐陰滿地掃
不得金轡玲瓏上源驛上源驛中搥畫鼓漢使作
客胡作主舞女不記宣和粧廬兒盡能女真語書
來寄我宴時詩歸髻知添幾縷絲有志未須深感

慨築城會據拂雲祠

滄灘

百夫正謹助鳴櫓舟中對面不得語須臾人散寂
無譁惟聞百丈轉兩車嘔嘔啞啞車轉急舟人已
在沙際立霧歛蘆村落照紅雨餘漁舍炊烟溼故
鄉回首已千山上峽初經第一灘少年亦慕宦遊
樂投老方知行路難

石首縣雨中繫舟戲作短歌

庚寅去吳西適楚秋晚孤舟泊江渚荒林月黑虎

欲行古道入稀鬼相語鬼語亦如人語悲楚國繁
華非昔時章華臺前小家住茆屋雨漏秋風吹悲
哉秦人真虎狼欺侮六國囚侯王亦知廢興古來
有但恨不見秦先亾開窓酌汝一杯酒等爲亾國
秦更醜驪山冢破已千年至今過者無傷憐

夜聞湖中漁歌

夢回一燈翳復明臥聞湖上漁歌聲嗚嗚乍低忽
更起嫋嫋欲斷還微縈初隨缺月墮烟浦已和殘
角吹江城悲傷似擊漸離筑忠憤如撫桓伊箏放
臣萬里憂國淚成客白首懷鄉情峽猿失侶方獨
宿沙雁垂翅猶遐征巴巫竹枝短亭晚瀟湘欸乃
孤舟橫世間此恨故相似使我百感何由平

夜聞姑惡

湖橋東西斜月明高城漏鼓傳三更釣船夜過掠
沙際蒲葦蕭蕭姑惡聲湖橋南北烟雨昏兩岸人
家早閉門不知姑惡何所恨時時一聲能斷魂天
地大矣汝至微滄波本自無危機秋菰有米亦可
飽哀哀如此將安歸

夢范參政

夢中不知何歲月長亭慘淡天飛雪酒肉如山鼓
吹喧車馬結束有行色我起持公不得語但道不
料今遽別平生故人端有幾長號頓足淚迸血生
存相別尚如此何況一旦泉壤隔欲懷雞黍病爲
重千里關河阻臨穴速死從公尚何憾眼中寧復
見此傑青燈耿耿山雨寒援筆詩成心欲裂

偶過浣花感舊遊戲作

憶昔初爲錦城客醉騎駿馬桃花色二人攜手上

江樓一笑鉤簾賞微雪寶釵換酒忽徑去三日樓
中香未滅市人不識呼酒仙異事驚傳一城說至
今西壁餘小草過眼年光如電掣正月錦江春水
生花枝闕處小舟橫閑倚胡牀吹玉笛東風十里
斷腸聲

寄黃龍升老

讀書萬卷裂儒衣黃金可成棄不爲快哉天馬不
可羈開口便呼臨濟兒諸方蹴蹋莫支持吾州一
老偶得之閉門夜付僧伽黎明日聲價羽檄馳弟

子不必不如師黃龍所立尤瑰奇空山鬼火號狐
狸築屋千礎食萬緇癡人不解公遊嬉嫉怒欲碎
門前碑世衰道喪士自欺山林亦復踐駭機長謠
寄公公試思吾輩救此當何施

五月十一日夜且半夢從大駕親征盡復

漢唐故地見城邑人物繁麗云西涼府
也喜甚馬上作長句未終篇而覺乃足
成之

天寶胡兵陷兩京北庭安西無漢營五百年間置

不問聖主下詔初親征熊羆百萬從鑾駕故地不
勞傳檄下築城絕塞進新圖排仗行宮宣大赦岡
巒極目漢山川文書初用淳熙年駕前六軍錯錦
繡秋風鼓角聲滿天苜蓿峯前盡亭障平安火在
交河上涼州女兒滿高樓梳頭已學京都樣

貧甚作短歌排悶

間何濶逢諸葛畏人常憂不得活事不諧問文開
不蹋權門更可哀卽今白髮如霜草一飽茫然身
已老惟有躬耕差可爲賣劍買牛悔不早年豐米

賤身獨饑今朝得米無薪炊地上去天八萬里空
自呼天天豈知

對酒

閑愁如飛雪入酒卽消融好花如故人一笑杯自
空流鶯有情亦念我柳邊盡日啼東風長安不到
十四載酒徒往往成衰翁九環寶帶光照地不如
留君雙頰紅

偶與客話峽中舊

我昔旅遊秋雨細建平城東門欲閉主人迎勞語

蟬聯小婦春炊縞衣袂長年三老半醉醒蜀估
商工算計須臾燈闇人欲眠泊船卸馱猶相繼山
深水嶮近蠻獠往往居民雜椎髻卽今屈指四十
年懷抱淒涼真隔世

夜聞松聲有感

清晨放船落星石大風吹颿如箭激回頭已失廬
山雲却上吳城觀落日夜深龍歸擘祠門入木數
寸留爪痕明朝就視心尙慄腥風卷地雷霆奔歸
船買酒特自慰性命平生驚屢戲固知神怒有定

時波紋蹙作魚鱗細如今衰病臥林垞霜覆茆簷
月滿庭松聲驚破三更夢猶作當時風浪聽

鹹齏十韻

九月十月屋瓦霜家人共畏畦蔬黃小罌大甕盛
滌濯青菘綠韭謹蓄藏天氣初寒手訣妙吳鹽正
白山泉香挾書旁觀穉子喜洗刀竭作厨人忙園
丁無事臥曝日棄葉狼籍堆空廊泥爲緘封糠作
火守護不敢非時嘗人生各自有貴賤百花開時
促高宴劉伶病醒相如渴長魚大肉何由薦凍齏

此際價千金不數狐泉槐葉麪摩挲便腹一欣然
作歌聊續水壺傳

耒陽令曾君寄禾譜農器譜二書求詩

歐陽公譜西都花蔡公亦記北苑茶農功最大置
不錄如棄六藝崇百家曾侯奮筆譜多稼儋州讀
罷深谷嗟一篇秧馬傳海內農器名數方萌芽今
君繼之筆何健古今一一辨等差我今八十歸抱
耒兩端入手喜莫涯神農之學未可廢坐使末俗
慚浮華

楊萬里

送蜀士張之源二子維燾中童子科西歸
岷山玉樣清
岷水眼樣明
風流文彩故應爾
又見張家雙驥子
小兒八歲骨未成
誦書新作鸞鶴聲
大兒十二氣已老
覓句談經人絕倒
豫章七年人得知
馱馱三日世便奇
天生異材能幾許
更飽風霜也未遲

上元夜里俗粉米爲繭絲書吉語置其中
以占一歲之福謂之繭卜因戲作

去年上元客三衢
衝雨看燈強作娛
今年上元家裏住
村落無燈惟有雨
隔溪叢祠稍簫鼓
不知還有遊人否
兒女炊玉作繭絲
中藏吉語默有所
兒祝身取官早
小女只求蠶事好
先生平生笑兒癡
逢場亦復作兒嬉
不願著脚金華殿
不願爭巢上林苑
只哦少陵七字詩
但得長年飽喫飯
心知繭卜未必然
醉中得卜喜欲顛

題曹仲本出示譙國公迎請太后圖自肅
天仗以下皆紀畫也

德壽宮前春晝長宮內花開宮外香太皇頤神玉
霄上都人久不瞻清光今晨忽見肅天仗翠華黃
屋從天降一聲清蹕萬人看天街冰銷積雪殘北
來又有一紅繖八鸞三駢金轂端輦中似是瑤池
母鳳鳥霞裳剪雲霧太皇望見天顏開萬國春風
百花舞乃是慈寧太后回鑾圖母子如初千古無
朔雲邊雪旗脚濕御柳宮梅寒影疎向來慈寧隔
沙漠倩雁傳書雁難託迎還駟馭彼何人魏武子
孫曹將軍將軍元是一縫掖功蓋天下只戲劇笑

隨赤松蠟雙屐飄然南山之南北山北君不見岳
家功成不抽身却遣秦家丞相嗔

贈寫真水鑑處士王溫叔

我不如森森千丈松又不如濯濯春月柳髯疎髻
秃已雪霜皮皺肉皺真老醜葉生晝時顏尚朱王
生晝時骨更臞一生愛山吟不就兩肩化作秋山
瘦君不見褒公鄂公圖凌烟腰間羽箭大如椽君
不見浣花醉圖粉墨落日斜泥滑驢失脚貴人寒
士兩相嗤畫圖猶在人已非王生王生且停手不

如生前一杯酒

題唐德明建一齋

城南前江後山址竹齋正對寒江啓不嫌漁火亂
書燈只苦櫓聲驚睡美平生刺頭鑽故紙晚知此
事無多子從渠散漫汗牛書笑倚江楓弄江水

行路難

君不見河陽花今如泥土昔如霞君不見武昌柳
春作金絲秋作帚人生馬耳射東風柳色桃花卻
長久秦時東陵千戶侯華蟲被體腰蒼璆漢初沛

邑刀筆吏折腰如磬頭搶地蕭相厥初謁邵平中
庭百拜百不磨邵平後來謁蕭相故侯一拜一惆
悵萬事反覆何所無二子豈是大丈夫窮通流坎
皆偶爾搏扶未必賢枋榆華胥別是一天地醉鄉
何曾有生死儂欲與君歸去來萬恨千愁付一杯

平望夜景

三冬冬三當當夜泊平望更點長新月無光湖有
光昨宵一雪今宵霜犬吠兩岍歸人忙夜深人靜
無一事畫燭炷殘人欲睡忽有漁舸外水來一棹

波聲風雨至半生墮落紅塵中浮家東吳東復東
樓船夜宿瑠璃國誰言別有水晶宮

積書巖宋詩刪第十一卷目錄

七言古詩五

王十朋 四首

朱熹 二首

呂祖謙 一首

徐照 一首

葉適 五首

樓鑰 一首

陳造 二首

王炎 一首

裘萬頃 一首

劉宰 一首

陳揆 一首

戴復古 一首

嚴羽 一首

魏了翁 一首

真德秀 一首

姚鏞 一首

劉克莊 十一首

文天祥 四首

謝翱 六首

鄧光薦 一首

謝枋得 一首

汪元量 一首

林景熙 三首

唐鈺 二首

程自修 二首

師嚴 一首

惠洪 七首

花藥夫人 一首

魏夫人 一首

李易安 一首

積書巖宋詩刪卷十一

錫山顧貞觀梁汾選

武陵胡獻徵存人閱

七言古詩五

王十朋

送王嘉叟編修

上書請劍人未復開口薦賢君又行堂上伊優笑
絕倒紛紛去國皆在生摺紳敢言似慶曆風俗漸
美如東京手揩老眼看除目一遷一去知誰榮南

昌別駕亦不惡三王高閣尋宗盟吳江漫漫楚天
濶羨君一葉春舟輕

讀孫子尙舊所寄書

故人之書不易得片紙隻字皆可惜收拾永爲巾
笥藏縱博千金不願易開緘展轉時一讀又未能
終淚橫臆之人門地盛衣冠萬里家居帝王宅干
戈繚繞飄吾鄉傾蓋論交似疇昔我年初冠君猶
少握手游從忝聯璧金溪風月供醉吟君唱我酬
常卽席君詩句句清且新高壓曹劉倒元白我才

短淺何足論彊伴寧容小生敵追風駿足橫海鱗
暫困鹽車與汙澤掉頭一去不可尋南北茫茫烟
水隔往年雁字時復傳近日詩筒杳難覓眼中不
見故人面紙上空懷故人迹人生會合能幾回一
別八年同瞬息我去無由君不來尊酒相逢更何
夕

次韻梁尉秦碑古風

會稽秦頌德碑丞相李斯篆世傳在秦望山莫
知所在教授莫君好奇嗜古搜訪尤力有言在

何山者莫以語某何山見於圖經在秦望東南
疑其真秦望也某欣然欲往職有所拘以告會
稽尉梁慨然而行登山果見之碑石僅存字磨
滅已盡墨片紙而還作古風長韻具記始末因
次其韻且記吾三人好事之癖亦以示後人也
姬嬴遺迹存者希世傳石鼓稽山碑石鼓揄揚得
韓子文與二雅爭驅馳秦碑夸大頌功德埋沒草
莽無人知或言山頂石猶在上有虎豹龍蛇螭神
藏鬼護荆棘蔽崖懸磴絕登無岐廣文好奇穴探

禹梅仙喜事僧尋支我贊其行要親覩勿受世俗
流傳欺望秦秦望兩嶄絕何山壁立東南涯豐碑
屹植最高處不知磨滅從何時剔苔掃墨了無有
模糊片紙亦足奇濃雲灑霽黯將雨古木槎牙蟠
老枝歸來走筆出險語訶政叱斯同小兒詩成得
得寫寄我詞嚴意偉法退之我聞秦人滅六國酷
若犬磔臨江麋先王法爲秦所負負秦况有秦有
司五經灰飛儒濺血堯舜周孔何能爲上蔡獵師
妙小篆奴視俗體徒肥皮東封太山南入越大書

深刻光陸離沙丘風腥人事變鬼飢族赤誰嗟咨
漢興萬事一掃去惟有篆刻餘刑儀磨崖欲作不
朽計其如曆數不及期蚩尤五兵紂漆器人物美
惡寧相疵我雖過秦愛遺畫南山入望頻支願不
須嶧陽訪棗刻不用遷史觀雄辭虛堂默坐對此
紙閉眼暗想君勿嗤要知秦碑没字本却類周雅
無言詩

李德遠寺簿敢言勇退今之古人也東嘉

王某賦詩以高其行

吳山蒼蒼烟靄橫皇都日日春風生利塗捷徑走
輪轂古道荆棘惟君行吳江洪濤拍天洶萬楫千
帆日相踵六鰲入釣猶不歸急流知退惟君勇斜
川勝事今臨川錦袍風月追謫仙芋魁豆飯吾亦
有脫屣却媿君翩然我輩情鍾惜離索爲國惜賢
情更惡江頭送別春尙寒回首冥鴻已寥廓

朱熹

秋夜歎

秋風浙瀝鳴清商秋草未死啼寒螿幽人夜半起

晤歎仰視河漢天中央河漢西流去不息人生辛
苦何終極蒼山萬疊雲氣深去鍊形魂生羽翼

題祝生畫

裴侯愛畫老成癖歲晚倦遊家四壁隨身只有萬
疊山秘不示人私自惜俗人教看亦不識我獨摩
挲三太息問君何處得此奇和璧隋珠未爲敵答
云衢州老祝翁曾次自有陰陽工峙山融川取世
界咳雲唾雨呼雷風昨來邂逅衢城東定交斗酒
歡無窮自然妙處容我說爲我掃此須臾中爾時

聞名今識面回首十年齊掣電裴侯已死我亦衰
祇君雖老身猶健眼明骨輕髮不變筆下江山轉
葱蒨爲君多織機中練更約無事重相見

呂祖謙

方齋行

世皆尙圓君獨方富貴可取君不忙閉門讀書聲
琅琅舊書重疊堆在牀點勘同異分邊旁運精竭
思心力彊十年足不離僧房荒山野路秋水長客
雖欲至嫌路妨幽蘭無人爲君芳采菊落英充餽

糧客卽不來有餘香

徐照

征婦思

年半爲郎婦郎去戍采石又云戍濠梁不得真消息
半年無信歸獨自守羅幃西風吹妾寒倩誰寄
郎衣姑老子在腹憶郎損心目願郎征戰早有功
生子有蔭姑有封

葉適

送徐景大

桃湖避秦之遠孫繞湖桃葉遮桃根父子聲名動
塲屋綠衫手板桃花村相隨入南訪靈迹九日山
重海深碧韓公文高大冊印秦系詩清小塲刻我
已衰殘書不成有語安能爲重輕子今自出瓊瑰
句南伯南侯倒屣迎

報德庵

王孫生長安仁宅親見宣仁靖家國艱難身後茗
水頭舉目湖山非舊識孩兒負土成新阡手種拱
把皆參天皇天報德無窮年蟠根翳葉藏雲烟

送鞏仲同

花溪初逢日苦短
橘洲重尋意更長
天催鶴鴿玉樓去
激流不並龍洲旁
春風忽高行旆起
酒盡何如添野水
古來交契看老時
與公安得輕別離

石經春秋一代奇
寶王氏爲熙豐學
廢不用瑞安沈彬
老躡而有之後世
孫體仁

閣以度焉余以名曰深明

喟昔洛門初上石未久
翻遭禁書厄沈公秘藏百
載餘高閣突兀共堆積
萬物散聚常橫陳汀花岸

草從紛紜海雲化雨龍
正起想象向來悲獲麟

呂子陽辭蘭谷家園却就石泉精舍

子陽意高希古人文如行空無定雲
清明未容詩酒污放曠自許漁樵親
故園好木日夜長友逝兄淪不同賞
改綠移紅事若何躡磴捫蘿心獨往
我昔迷津經上峽關出飛亭壓行路
石影參差研匣寒花陰回薄書籤
算離家十里山轉深琅玕滿地芝
成林竹雞睡去月當午閑聽孫登
長嘯音

題龍眠畫騎射抱毬戲

綠楊幾枝插平沙柔梢裊裊隨風斜紅綃去地不
及尺錦袍壯士斫鬃射橫磨箭鋒滿分靶一箭正
截紅綃下前騎長纓抱繡毬後騎射中如星流繡
毬飛礮最難射十中三四稱爲優元豐策士集英
殿金門應奉人方倦日長因過衛士班飛騎如雲
人馬健駕幸寶津知有日窮景馳驅欣縱觀龍眠
胸中空萬馬駭目洞心千百變追圖大概寫當時
至今想像如親見靜中似有叱咤聲墨淡猶疑錦
馬有如此長驅爲決單于戰

陳造

望夫山

亭亭碧山椒依約凝黛立何年蕩子婦登此望行
役君行斷音信妾恨無終極堅誠不磨滅化作山
上石烟悲復雲慘髣髴見精魄野花徒自好江月
爲誰白亦知江南與江北紅樓無處無傾國妾身
爲石良不惜君心如石那可得

田家謠

麥上場蠶出筐此時祇有田家忙半月天晴一夜
雨前日麥地皆青秧陰晴隨意古難得婦後夫先
各努力倏涼驟暖繭易蛾大婦絡絲中婦織中婦
輟閑事鉛華不比大婦能憂家飯熟何曾趁時喫
辛苦僅得蠶事畢小婦初嫁當少寬令伴阿姑頑
過日明年願得如今年剩貯二麥饒絲綿小婦莫
辭擔上肩却放大婦當姑前

王炎

題遠山平林圖

山色微茫疑有無木葉半脫殊蕭疎雲根更著數
椽屋此屋當有幽人居墨妙逼真乃如此畢竟非
真惟似耳何如屐齒飽經行是處溪山皆畫裏還
君圖書吾且歸家在江南依翠微

裘萬頃

厭原山中曉行

碧鷄夜半聲啁晰喚起幽人步林樾秋高風露著
羣木無數寒花泣明月松篁一徑宛如畫石溜涓

涓更清絕山顛便好結茅廬莫待他年鬢成雪

劉宰

鴉去鵲來篇

昨日鴉鳴繞庭樹道上行人色驚懼試呼行者問
如何身爲戶長催殘稅殘稅自昔稱難理三年尤
非四年比加之逐保有逃戶每一申明官長怒人
逃信矣田不逃其奈逃田不知處厥初經界失區
畫比近立租相什伯大家置產錢欲輕小家鬻產
價欲增上田只割下田賦賦存田盡因逃去或因

土瘠遂流移歲久田侵人不知更有鄉胥迫科抑
多推少割隨胸臆民愚而神難盡欺徃徃增入逃
戶籍以茲逃戶日增多戶長蚩蚩奈若何向來差
役多輕重戶長之中中產衆比來里正多義役各
欲供須有全力搜羅中產無子遺戶長人人家四
壁官司禱雨徧明神施行寬政蠲房緡房緡僅可
寬遊手那得實惠霑農民千錢代輸猶可出今日
方輸又明日父兮母兮叫不聞遺體鞭笞同木石
日日鴉鳴期會到血灑公庭深不掃遂令着處聽

鴉鳴魂魄飛散心如擣和氣致祥乖致異已甘旱
魃來爲祟忽驚鴉散鵲交飛高枝報喜仍低枝萬
口歡呼聲動地府今盡放三年稅曳鈴走卒天上
來立張大榜當衢市黠胥駭愕頓兩足戶長仰天
攢十指瘡痍未愈失呻吟感激過深仍涕淚又說
新租亦寬限四年舊欠寧不爾亦知經賦難追責
少紓庶可容催索使君從善真如流仁人之言爲
慮周畫諾一時良易易幾人共拜更生賜人意會
同天意感急足未回時雨至始知此術勝祈禳開

闔陰陽俄頃耳何妨甘澤尙愆期我作此詩禱告
之象龍可仆蜥蜴縱蛟龍自起霹靂隨謂予不信
難強語請驗吾邦今日雨詩成欲謝更有所新租
輸送此其時分科本色歸上戶細民勿使折納遲
四年逃闕尙克數積弊那能倉卒去且應除豁見
真的孰恃強梁敢逋負若然民病八九瘳閒暇何
妨版築修推排得人弊可見逃租十失五可收更
令義役廣前制戶長里胥同一體庶幾二役適均
平不使貧民偏受敝豈惟澍雨快一朝縱有凶年

皆樂歲報喜不惟乾鵲噪丈人屋上烏亦好

陳揆

訪王隱居

季鷹雅志本江湖胡爲入洛計誠踈一杯尊羹入
歸夢歲晚僅飽松江鱸何如王郎十畝宅一生江
頭枕江碧西風落日弄烟波却笑陶朱計然策我
來訪君春已深江花江柳翻綠陰相攜三徑拾瑤
草爲問客來何苦心固知此事君計得我被微官
苦相逼勸君慎勿語彈冠便恐紛紛北山檄

戴復古

鄂渚張唐卿周嘉仲送別

武昌江頭人送別楊柳秋來不堪折漢陽門外望
南樓昨日不知今日愁英雄握手新相識人情正
好成南北酒闌人散最關情一雁西飛楚天碧

嚴羽

還山吟

日暮望南山悵然歸思發如何山中客屢看城頭
月城頭月照女蘿秋石磴潺湲瀉碧流巖猿久別

應惆悵澗鳥相呼亦共愁城南故人與我好令我
忘却歸山道昨夜西窓夢到家忽驚千嶂芝花老
朝來舟子促辭君回首空江語尙聞別後莫嗟難
見面相思只望嶺頭雲

魏了翁

七夕南定樓飲同官

誰將明星貼天宇州國宮垣象官府更將四七隨
天旋常以昏中殷四序迢迢河漢衡秋旻前有蒼
龍履玄武牽牛正向西南來左右兩旗北河鼓鼓

星之側爲天桴鼓上三星爲織女何年人號天女
孫便把牛郎擬夫婦不知此是天關梁河漢之津
有常度晦明伏見莫非教冑爲文人給嘲侮班曹
庾謝猶誓言世上兒曹更堪數臨風三誦大東詩
須信詞章有今古

真德秀

挹仙亭

漢宮葦篴兒呱呱濟南梓柱陰扶踈富平家人正
媮樂安昌帝師王獻諛子真東南一尉耳黃綬淒

涼百僚底手持短疏叩天闈義激丹衷淚橫背翩
然一朝徑拂衣愛君無路空依依人傳九江已僊
去吳門再見是耶非神仙茫茫那可測上帝從來
賞忠直天下果有騷鸞人合領羣真朝北極自從
舉手謝世間千年白鶴何時還玉簫聲斷杉檜冷
祇餘丹竈留空山谷口之孫古膚使亭斲青冥挹
仙袂耿耿應懷貫日忠飄飄豈美凌雲氣我來快
讀華星篇清徹毛骨風冷然何當結茆最高頂一
榻容我分雲烟

姚鏞

春夜曲

金魚鑲合蘭釭小酒不支愁尋睡早梨花欲墮風
更寒燕子不歸春自老流蘇護帳香雲結三十六
簧清吹咽緘書欲寄湘水深城烏啼落花西月

劉克莊

築城行

萬夫喧喧不停杵杵聲丁丁驚后土徧村開田起
窰竈望青斫木作樓櫓天寒日短工役急白棒呵

責如風雨漢家丞相方憂邊築城功高除美官舊
時廣野無城處而今烽火列屯戍君不見高城巖
巖如魚鱗城中蕭疎空無人

開壕

前人築城官已高後人下車來開壕畫圖先至中
書省諸公聚看稱賢勞壕深數丈周十里役兵火
半化爲鬼傳聞又起旁縣夫鑿教四面皆成水何
時此地不爲邊使我地脉重相連

運糧行

極邊官軍守戰場次邊丁壯俱運糧縣符旁午催
調發大車小車聲軋軋霜寒晷短路又滑擔夫肩
穿牛蹄脫嗚呼漢軍何日屯渭濱營中子弟皆耕
人

國殤行

官軍半夜血戰來平明軍中收遺骸埋時先剝身
上甲標成叢塚高崔嵬姓名虛挂陣亡籍家寒無
俸孤無澤烏虜諸將官日穹豈知萬鬼號陰風

軍中樂

行營面面設刁斗帳門深深萬人守將軍貴重不
據鞍夜夜發兵防隘口自言敵畏不敢犯射麋捕
鹿來行酒更闌酒醒山月落綵縑百段支女樂誰
知營中血戰人無錢得合金瘡藥

寄衣曲

征夫去時着紵葛征夫未回天雨雪夜呵刀尺製
寒衣兒小却倩人封題上有淚痕不教洗征夫見
時認針指殷勤着向邊城裏莫遣寒風吹腩理江
南江北一水間古人萬里戍玉關

朝陵行

國家諸陵陷河北盜發寶衣斧陵木或言陵下往
來人夜聞翁仲草間哭何年却遣朝陵官含桃瓊
瓌登金槃悲哉人家墳墓各有主誰修永昌一杯
土

破陣曲

黃旗一片邊頭迴兩河百郡送款來至尊御殿受
捷奏六軍張凱聲如雷元戎劔履雲臺上麾下偏
裨皆將相腐儒筆力尙跌宕燕山之銘高十丈

蘇李泣別圖

風雲慘悽草樹枯死笳鳴馬嘶弦驚鶻起熟看景色非人間祁連山下想如此手持尊酒別故人此生再面真無因胡兒漢兒俱動色路傍觀者爲悲辛歸來暗灑茂陵淚子孟少年方用事白頭屬國冷如水空使穹廬歎忠義茫茫事往賴畫存每愁歲久縑素昏卽今畫亦落人手古意淒涼誰復論

題龍眠十八尊者

嘗聞天台境肉身往無從仁夫示此圖恍惚游其中應真一一若舊識或踞怪石臨飛淙山鬼投牒何敬恭天女問法尤丰茸盆魚鬢鬣等針粟放去天矯拏空濛山深無人地祇出被服導從伴王公前驅鸞獸後夔魍徐行殿以一瘦筇巉巖蒼壁謾謾松下有老宿眉雪濃石橋滅沒雲氣斷似是鬼國非天宮層冰融結挾怒瀑毒虺噴薄含腥風至人於此方入定壞衲冪首枯株同等閑一坐六十劫汝技有盡吾無窮書生往往談性命休以禍福猶兒童倒持手版口勸進對此寧不面發紅我知

龍眠筆外意要與濁世鍼盲聾退之云釋善變幻
愷之謂盡能神通幻耶神耶爾莫詰與子持叩西
山翁

和南塘食荔歎

君欲和詩無怱怱唱首天下文章公今年荔子况
倍熟亭亭錦蓋高張空猿偷鴉啄牧童采林間殘
顆猶殷紅在昔唐家充歲貢吟諷何止杜陵翁南
窮交州西蜀土快馬馱送如飛龍絳裳冰肌初照
眼玉環一笑恩光濃惟閩以遠幸免漉一顆不到

溫泉宮自從陳紫無真本皴玉晚出尤稱雄邇來
雞舌擅瑰瑋贊香譽味萬喙同麟臺仙人親品題
天爲此果開遭逢乃知微物似有數聲價亦與時
汗隆列聖儉德被華戎微如淮白不敢供柰何置
驛奉私室安得木鐸觀民風山蹊谷塹日力窮血
肩蹠足馳筠籠請公移此食荔歎置在熏風殿閣
中

文天祥

六歌

有妻有妻出糟糠自少結髮不下堂亂離中道逢
虎狼鳳飛翩翩失其凰將雛一一去何方豈料國
破家亦亡不忍舍君羅襦裳天長地久終茫茫牛
女夜夜遙相望嗚呼一歌兮歌正長悲風北來起
徬徨

有妹有妹家流離良人去後攜諸兒北風吹沙塞
草淒窮猿慘淡將安歸去年哭母南海湄三男一
女同歔歔惟汝不在割我肌汝家零落母不知母
知豈有瞑目時嗚呼再歌兮歌孔悲鶴鴒在原我

何爲

有女有女婉清揚大者學帖臨鍾王小者讀字聲
琅琅朔風吹衣白日黃一雙白璧委道傍雁兒啄
啄秋無梁隨母北首誰人將嗚呼三歌兮歌愈傷
非爲兒女淚淋浪

有子有子風骨殊釋氏抱送徐卿雛四月八日摩
尼珠榴花犀錢絡繹襦蘭湯百沸香似酥歛隨飛
電飄泥塗兄十三騎鯨魚汝今知在三歲無嗚
呼四歌兮歌以吁燈前老我明月孤

有妾有妾今何如大者手將玉蟾蜍次者親抱汗
血駒晨粧靚服臨西湖英英雁落飄瑠琚風花飛
墜鳥嗚呼金莖沆瀣浮汗渠天摧地裂龍鳳殂美
人塵土何代無嗚呼五歌兮歌鬱紆爲爾遡風立
斯須

謝翱

瓊花引

后土祠前車馬道天人種花拾瑤草英雲蕊珠欲
上天夜半黃門催進表酒香浮春露泥二十四橋

色如洗陰風吹雪月墮地幾人不得揚州死孤貞
抱一不再識夜歸闔風曉無蹟蒼苔染根烟雨泣
歲久遊魂化爲碧

賦得北府酒

北府酒吹溼宮城柳柳枝著地春垂垂祗管人間
新別離離情欲斷江水語女兒連臂歌白紵淮南
神仙來酒坊甲馬獵獵羽林郎百年風物烟塵蒼
老兵對月猶舉觴青帘淚濕女墻下曾識行軍舊
司馬

虞美人草詞

鬪體起語鳴叫嘯山精夜啼楚王廟渡淮風雨八
千人叱咤向天成白道身輕百戰轉危亡狼藉悲
歌出漢堡夜帳天寒抱玉泣血變草青烟曉濕他
年辟仇春草生吳中草花無妾各自從爲草生西
楚得到吳中猶楚舞

秋日擬塞下曲

落日燉煌北妖星太白西涼風吹沙磧帳下玉人
啼吹沙復吹草嘶馬未知道醉後聞槍鈴長天忽

如掃野駝尋水向月行露下胡兒食秋棗

後瓊花引

揚州城門夜塞雪揚州城中哭明月墮枝濕雲故
鬼愁西來陰風舞健鶻神鴉愁空衆芳歇一夕蒼
苔變萼髮宮花織簾塵掩襪玉萼無因進吳越灘
灘淮水山央央誰其死者李與姜

有洗舊誥綾作青色鸞將以爲緣以紺繒
易得之作首卷賦小樂章求好事書其

後

吳宮輦路傷行客
繭水壓雲凝碧色
門前新掃染
家隣借人鋪設殘衣帛
宮花剪綾連院號
覆取翻看成一道
織紋宛轉勅字新知是初誰
六尺誥城霞失彩
宮蘚病中與海圖
上衣領改顏倖售緣所
遭褪藥玄香洗藍影
青綾易得淚承睫
擊筑楚歌無故業
歌殘求書好事人
異代倘傳誥綾帖

鄧光薦

鷓鴣詞

行不得也哥哥
哥哥瘦妻弱子羸
特馱天長地濶多綱

羅南音漸少
北語多肉飛不起
可奈何行不得也

哥哥

謝枋得

荆棘中杏花

墻東荒蹊抱溪斜
荆棘狼籍盤根芽
何年丹杏此留種
小紅濺濺爭春華
野人慣見漫不省
獨有詩客來咨嗟
天真不到鉛粉筆
富艷自是宮闈花
曲池芳逕非宿昔
蒼苔濁酒同天涯
京師惜花如惜玉
曉擔賣徹東西家
杏花看紅不看白
十日憔悴殺

遊春車誰家園裡有此樹鄭重已著重幃遮阿嬌
新寵貯金屋明妃遠嫁愁邊笳落花縈簾拂牀席
亦有飄泊沾泥沙天公無心物自物得意未用相
陵誇黃昏人歸花不語惟有落月啼棲鴉

汪元量

夷山醉歌

楚狂醉歌歌正發更上梁臺望明月西風獵獵吹
我衣絕代佳人皎如雪搥羯鼓彈箜篌烹羊宰牛
坐糟丘一笑再笑揚清謳過看汴水波聲小錦纜

忘還事多少昨日金明池上來艮嶽淒涼麋鹿遶
麥青青黍離離萬年枝上鴉亂啼二龍北狩不復
返六龍南渡無還期金銅淚迸露盤濕畫闌桂柱
酸風急鳩居鵲構蒼隼入蛇出燕巢白狐立東南
地陷妖氛黑雙鳳高飛海南陌吳山日落天沉沉
母子同行向天北關河萬里雨露深小儒何必悲
苦辛歸來耳熱忘頭白買笑揮金莫相失呼奚奴
吹箏篋美人縱復橫今夕復何夕楚狂醉歌歌欲
輟老猿爲我啼竹裂

林景熙

春感

柳花袞雪春冥冥溪風一夜吹爲萍萍隨風去渺
流水人生無根亦如此故山入夢草芊芊半窓疎
雨寒食天曉來白髮稀可數多少朱顏化黃土高
原冉冉青烟斜麥飯灑松能幾家子規叫殘金粟
暮繭紙蘭亭已飛去

冬青花

冬青花花時一日腸九折隔江風雨晴影空五月

深山護微雪石根雲氣龍所藏尋常螻蟻不敢穴
移來此種非人間曾識萬年觴底月蜀魂飛遶百
鳥臣夜半一聲山竹裂

送葛居士住栖碧菴

越山巉巉越臺孤井中雙鰓曾走吳滿坡叢竹遺
舊箭回首霸業空烟蕪詩人訪古凌絕壁危樓竟
欲老深碧聲搖孤枕海濤壯影伴瘦筇山月白了
然道者亦離塵一龕松下分秋雲祇今虎豹滿平
陸鍊骨誰與箋青旻琴心劍氣兩寂寞醉墨淋漓

風雨落九十九峯歸夢寒玉笙泠泠跨飛鶴

唐 珣

冬青花

冬青花不堪折南風吹涼積香雪遙遙擎蓋萬年
枝上有鳳巢下龍穴君不見犬之年羊之月霹靂
一聲天地裂

清明日

萬花正開風雨惡曉起新晴花正落老夫未起失
芳期賞心但覺隨年薄今年花落明年開去年看

花人不來死生榮悴俱可哀綠沉滿地成蒼苔

程自修

王猛墓

男兒有才須有識死塋荒陲真可惜君不見渴虎
不飲盜泉水始吾虞君今已矣

痛哭

日射石虬鱗甲開草色又換青春回精靈聚散豈
拘束山鬼叫呼松栢哀當時沸天簫鼓動今日悲
風陵上來恩恩今古誠傳舍人生有情淚如把乾

坤誤落腐儒手但遣空言當汗馬西晉風流絕可
思悵望千秋共瀟灑

師嚴

藺五見訪

漢陰美人青兕裘獨騎瘦馬尋荒丘花前下馬迎
一笑珠玉在側形骸羞酒酣散髮箕踞坐錦帶爛
熳縣吳鉤斷蛟刺虎好身手碧瞳如水涵清秋惜
哉科目大脫畧壯士豈爲章句囚中原格鬪困不
已江波木落寒悠悠

惠洪

山寺早秋

千本蒼杉俱合抱夕陰相映寒蟬噪殘僧獨歸清
入畫秋色滿庭濃可掃霜鐘初歇月未生但覺篝
燈一點明階除環珮走流水樓閣誦經童子聲

同景莊游浯溪讀中興碑

上皇御天功最盛生民溫飽臥安枕醉凭艷姬一
笑適薄夫譏之無乃甚長安遮天胡騎塵潼關戰
血深没人哥舒臣賊不足惜要鬻國忠如膾鱗蒼

黃去國食不暇馬嵬賜死謝天下反身罪已成湯
心奈何猶有譏之者取非其予又遽忽靈武君臣
無作容何須嗚咽讓袞服自控歸鞍八尺龍誰磨
石壁湘江上拂拭雲烟濺驚浪龍蛇飛動忠義詞
顏嚴色莊儼相向與君來游秋滿眼閒行古寺西
風晚道人興廢了不知但見游人來讀碑

汪履道家觀所蓄烟雨蘆鴻圖

西湖漠漠生烟雨浦浦圓沙鳧雁聚今日高堂素
壁間忽見西湖最西浦翩翩兩雁方欲下數隻飄

然掠波去獨餘一隻方穩眠有夢不成亦驚顧蕭
梢碧蘆秋葉赤青沙白石紛無數我本江湖不繫
舟爾輩况亦江湖侶令人便欲尋睿郎呼船深入
龍山塢

龍安送宗上人游東吳

淮水送君春雨餘刺舟斷岸歸匡廬江南別我秋
天遠輕囊瘦策游西湖君去復來如社燕我獨留
滯如賈胡牽衣覓詩亦不惡怪君兒戲忘髭須平
生千偈風雨快約束萬象如驅奴飢來一字不堪

煮乃知弄筆輸耕鋤不如尋我舊遊處武林清境
天下無耐清不得却來此作詩送君遊上都

福巖寺夢訪廓然於龍山路中見之

山高夜氣消煩暑竹風爲作南軒雨夢隨柔櫓到
西興艤舟步入龍山塢蕭蕭松下逢睿郎問信遠
來亦良苦覺來但記談笑歡不省歡時竟何語臥
看篝燈一點明嶺海茫茫隔吳楚安得卻如清夢
中杖履追隨長爾汝

送王彥齡承務還河內

武陵王郎高韻度鞍馬四方無定住眼逢泉石便
吟哦咳唾珠璣不論數我亦悠悠事不羈浪萍風
梗隨安之少室山前古蘭若邂逅便與同襟期興
來岸幘一長嘯清聲激越穿雲嶠竹林故事獨未
泯人物如君獨高調秋風獵獵促鳴蟬歸路千山
入馬鞭白袍烏袖宜圖畫不羨襄陽孟浩然

鄭南壽攜詩見過次韻謝之

砢砢世旣以爲玉芝蘭那知不爲蕪人間萬事醉
不理攜被來爲林壑游雪花成山過驚浪直展暮

天開橘洲篙師絕叫風掠耳蕭蕭兩鬢空颼颼松
聲盤空上烟翠顧陟佳處頻遲留袖中出詩愕坐
客涔蹄乃爾容吞舟東坡句法補造化山谷筆力
江倒流兩翁連聯竟仙去暮年見子忘百憂念當
明日江南路幕戶倚天佳氣浮故人問我今何似
爲道摧頽如慧球

花藥夫人

秋宵詞

冰肌玉骨清無汗水殿風來暗香滿繡簾一點月

窺人欹枕欒橫雲鬢亂起來庭戶悄無聲時見疎
星渡河漢屈指西風幾時來不道流年暗中換

魏夫人

虞美人草

鴻門玉斗紛如雪十萬降兵夜流血咸陽宮殿三
月紅鬪業已隨灰燼滅強暴必死仁義王陰陵失
道非天亡英雄本學萬人敵何用屑屑悲紅妝三
軍散盡旌旗倒玉帳佳人坐中老香魂夜逐劍光
飛青血化爲原上草芳心寂寞倚寒枝舊曲聞來


似斂眉哀怨徘徊愁不語恰如夜聽楚歌時滔滔
逝水流今古漢楚興亡兩丘土當年遺事久成空
慷慨尊前爲誰舞

李易安

浯溪中興頌碑和張文潛

五十年功如電掃華清花柳咸陽草五坊供奉鬪
雞兒酒肉堆中不知老叛兵忽自天上來逆臣亦
是奸雄才勤政樓前走戎馬珠翠踏盡香塵埃何
爲出戰輒披靡傳置荔枝多馬死堯功舜德本如

天安用區區紀文字著碑銘德真陋哉乃令神鬼
磨山崖子儀光弼不自猜天心悔禍人心開夏爲
殷鑒當深戒簡策汗青今具在君不見當時張說
最多機雖生已被姚崇賣



Vertical text or markings on the right edge of the page, possibly a page number or a small inscription.

